

Yangi O'zbekiston taraqqiyoti uchun birlashaylik!



asr

O'ZLIDER
IJTIMOIY-SIYOSIY GAZETA

Gazeta 2004-yil 1-yanvardan chop etila boshlangan

19-yanvar 2023-yil 3 (1001)



www.21asr.uz



@XXIasrofficial

МУНОСАБАТ



ЎЗБЕКИСТОН ВА СИНГАПУР:

ЯҚИН ИСТИҚБОЛДАГИ ҲАМКОРЛИКНИНГ ОЛТИ ЙЎНАЛИШИ

Сингапур Ўзбекистон мустақиллигини 1992 йилдаёқ эътироф этган, 1997 йил 8 апрелда эса дипломатик алоқалар ўрнатилган. Савдо-иқтисодий шартномалар имзоланди. 2003 йил 15 июлдаги "Иқтисодий ва маданий ҳамкорлик тўғрисида"ги битим муносабатларни кенгайтириш йўлидаги муҳим ҳуқуқий асослардан бири бўлди.

Асримиз бошида Ўзбекистоннинг Жануби-шарқий Осиё давлатлари билан товар айирбошлаш ва савдо муносабатларида Сингапур биринчи ўринни эгаллади. 2005 йилга келиб бу кўрсаткич 76,1 миллион АҚШ долларини ташкил этган, бу эса 2003 йилга нисбатан уч баробарга кўп эди. Кейинги йилларда Сингапур Ўзбекистоннинг йирик савдо шеригига айланди. Экспорт ва импорт муносабатлари йилдан йилга ўсиб борди.

2017 йилга келиб дипломатик ва иқтисодий алоқалар янада ривожланиб, иккала мамлакат ўртасида нафақат иқтисодий, балки таълим соҳасида ҳам ҳамкорлик ривожланди. Минтақавий барқарорлик ва изчил тараққиёт масалаларида ҳам муносабатлар йўлга қўйилди. Ўзаро ҳамкорлик бугун устувор йўналишларда жадал сурьатлар билан бормоқда. Жумладан, савдо-иқтисодий соҳада сезиларли натижаларга эришилди. Кейинги йилларда товар айирбошлаш икки баробар ошди. Ўзбекистонда Сингапур капитали иштирокидаги корхоналар сони 4 қарра кўпайди. Ушбу мамлакатдан юртимиз иқтисодиётига тўғридан-тўғри инвестициялар ҳажми 700 миллион долларга етди. Айтиши жоизки, яна кўплаб соҳаларда амалий ҳамкорликни кенгайтириш учун катта имкониятлар мавжуд.

Сингапур – Осиё-Тинч океани минтақасининг иқтисодий маркази. Кўп йиллардан буён электроника, кимё саноати, биотехнология, банк соҳаси, логистика ва транспорт машинасозлиги каби муҳим тармоқларда муваффақиятларига таяниб, жаҳондаги йирик ва ривожланган иқтисодиётлардан бири бўлиб келмоқда.

Давлатимиз раҳбари 16-17 январь кунлари Сингапурга қилган олий даражадаги ташрифи давомида ушбу мамлакат билан яқин истиқболдаги ҳамкорликнинг олти йўналишини таъкидлаб ўтди.

Биринчидан, инсон капитални ривожлантириш ва давлат бошқаруви учун юқори малакали кадрлар тайёрлаш масаласи. Ли Куан Ю номидаги Давлат сиёсати мактаби иштирокида бошқарув, шаҳарсозлик, инфратузилмани ривожлантириш, рақамли трансформация, инновациялар, таълим ва соғлиқни сақлаш соҳаларида биргаликда давлат хизматчиларини тайёрлаш ва уларнинг малакасини ошириш дастурини жорий этиш. Шунингдек, Ўзбекистон

тон Давлат бошқаруви академияси негизинда Сингапурнинг етакчи экспертларини жалб қилган ҳолда давлат хизматчиларини интенсив қайта тайёрлаш дастурини ишга тушириш. Иккинчидан, Сингапурни Ўзбекистондаги хусусийлаштириш жараёнларига жалб қилиш. Сингапурнинг етакчи компаниялари илғор тажрибаси, замонавий технологиялари ва бошқарув усулларидан фойдаланган ҳолда Ўзбекистоннинг йирик корхоналарини хусусийлаштириш доирасидаги лойиҳаларни амалга ошириш.

Учинчидан, илғор "яшил" технологиялар ва рақамли ечимларни жалб қилиш. Сингапурнинг рақамлаштириш соҳасидаги ютуқларини жорий этиш, шунингдек, бу мамлакатнинг "яшил" ривожланиш бўйича инновациялари ва технологияларини қўллашда ҳамкорлик;

Тўртинчидан, шаҳар инфратузилмаси ва коммуникацияларни такомиллаштириш. Шаҳарларни режалаштириш ва қурилиш, кўчаларнинг яшил, коммунал хўжалик соҳаларида ҳамкорлик;

Бешинчидан, инвестициялар ва ўзаро савдони кенгайтириш, Сингапурнинг етакчи компаниялари билан кўшма лойиҳаларни амалга ошириш. Бу борада устав капитали 500 млн. доллар бўлган Ўзбекистон-Сингапур инвестиция компанияси ташкил этиш бўйича келишувга эришилди.

Олтинчидан, жамоат хавфсизлигини таъминлаш, миллатлараро тотувликни асраш ва радикализмга қарши курашиш борасида тажриба алмашиш.

Музокаралар яқини билан 8 та ҳужжат алмашиш жараёни бўлиб ўтди. Хусусан, таълим, транспорт, соғлиқни сақлаш, кадрлар, шу жумладан, давлат хизматчиларини тайёрлаш соҳаларида ҳамкорлик битимлари қабул қилинди. Савдо-иқтисодий шериклик ҳамда икки мамлакат прокуратуралари ўртасидаги ҳамкорлик келишувларига эришилди.



Феруза НИҒМАТОВА,
Олий Мажлис Қонунчилик палатаси
депутати, O'zLiDeP фракцияси аъзоси

ИҚТИСОДИЙ РИВОЖЛАНИШ ХАЛҚ ФАРОВОНЛИГИНИ ТАЪМИНЛАЙДИ

**МАМЛАКАТИМИЗДА
2016 ЙИЛДАН ХАЛҚИ-
МИЗ ҲАЁТИНИ ЯНАДА
ЯХШИЛАШ ВА СИФАТ-
ЛИ ИШ ЎРИНЛАРИНИ
КЎПАЙТИРАДИГАН
БИЗНЕС УЧУН ҚУЛАЙ
МУҲИТНИ ЯРАТИШ
МАҚСАДИДА ТИЗИМЛИ
ИСЛОҲОТЛАР БОШ-
ЛАНДИ ВА УНИНГ
САМАРАСИ БУГУН
АМАЛДА ЎЗ АКСИНИ
ТОПЯПТИ.**

Изчил ислоҳотлар исботи шуки, Ўзбекистон иқтисодиёти барқарор ўсиб бораётган ва ўртача даромадли мамлакат мақомига эга бўлди. Прогноз кўрсаткичларга кўра, жорий йилда тарихимизда илк бор ЯИМ ҳажми 80 млрд. АҚШ долларидан ошган бўлса, 2025 йилга бориб бу кўрсаткич 104-110 млрд. долларга етиши тахмин қилиняпти. Мураккаб геосиёсий вазиятда ҳам иқтисодиётнинг ўсиш суръати 2022 йили 5,7 фоизни ташкил этди.

Халқаро миқёсдаги мураккаб вазиятга қарамаздан, асосий истеъмол товарлари нархларининг ошиши туфайли вужудга келган ижтимоий муаммоларни бартараф этиш ҳамда аҳолининг тўлов қобилияти барқарорлигини таъминлаш мақсадлари изчиллик билан амалга оширилди. Жумладан, ўтган йили тарихда биринчи марта пенсия ва ижтимоий нафақалар миқдори минимал истеъмол харажатларидан кам бўлмаган даражага олиб чиқилди. Кам таъминланган 2 миллиондан ортиқ оилага давлат томонидан ижтимоий ёрдам кўрсатилди ва бу йўналишга ажратилган маблағлар эса 7 баробар кўпайтирилиб, йилга 11 триллион сўмга етказилди. Шунингдек, жорий йилда давлат инвестицияси дастурлари маҳалла даражасига туширилиб, аҳоли томонидан тақлим

берилган сув, электр энергияси, йўл, мактаб каби йўналишлар бўйича лойиҳалар учун 8 триллион сўм ажратилиши белгиланди.

Турли глобал омишлар сабабли юзага келган инфляциян омишлар таъсирида 2022 йилда

устувор вазифа сифатида белгиланган.

Инфляцияга номонетар омишлар таъсирини пасайтириш ва асосий озиқ-овқат маҳсулотлари нархлари барқарорлигини таъминлаш бўйича қўшимча

чиқариш самарадорлигини ошириш асосида жамият аъзоларининг турмуш фаровонлиги даражасини кўтаришдан иборат.

Мамлакатимизда амалга оширилаётган солиқ сиёсати бизнес соҳасини рағбатланти-



ги инфляция даражаси 12 фоиз кўрсаткич атрофида сақлаб қолинди. Жаҳон миқёсда иқтисодий мавҳумликлар давом этиши эҳтимоли юқори бўлса-да, 2023 йилда инфляция 9,5 фоизгача пасайиши кутилляпти.

Қайд этиш керакки, халқаро муносабатлардаги ноаниқликларга қарамаздан, мамлакатимизда инфляция даражасини бир хонали рақам атрофида сақлаб қолиш ва нарх-наво барқарорлигини таъминлашга алоҳида эътибор қаратилмоқда. Бунда икки бозорни истеъмол товарлари билан тўлдириш, асосий истеъмол товарлари нархлари мавсумий тебранишларидан келиб чиқиб, "хатар даражасининг таҳлили" тизимини жорий қилиш

чоралар кўриляпти. Пул-кредит сиёсатининг қатъийлаштирилиши ва давлат томонидан ички нархлар кескин ошиб кетишининг эҳтимоли юқори бўлган чоралар ташқи инфляциян хатарларнинг ички бозорга таъсирини маълум даражада юмшатишга хизмат қилди.

Ўзбекистон иқтисодий ривожланишда бозор муносабатларига юз тутар экан, ижтимоий ҳаётнинг барча соҳаларида бўлгани каби бюджет-солиқ сиёсатида ҳам чуқур ислоҳотларни амалга оширишга тўғри келди. Ҳозирги шариотда ишлаб чиқилган давлат бюджет-солиқ сиёсати концепциясининг мақсади иқтисодиётни барқарор ривожлантириш, ижтимоий ишлаб

ришга хизмат қилмоқда. Сўнгги йилларда солиқларнинг умумий сони 13 тадан 9 тага туширилди. Мол-мулк, шахсий даромад ва ижтимоий солиқ ставкалари икки баробар пасайтирилди. Импорт бўйича 6 мингга яқин бож ставкалари ҳам камайтирилди. Шунингдек, ўтган беш йил ичида 200 га яқин лицензия ва рухсатномалар бекор қилинди ёки соддалаштирилди. Тадбиркорлик субъектлари зиммасидаги солиқ юқини янада камайитириш ҳамда солиқ маъмуриятининг такомиллаштирилишига қаратилган чора-тадбирлар тизимли равишда давом эттирилмоқда.

Давоми 3-саҳифада. ►►

ДИҚҚАТ, ЯНГИ РУКН!



КУТИЛГАН ВА КУТИЛМАГАН САВОЛЛАР

Анъанани бир хилликдан ажрата билиш даркор. Бир хиллик зериктиради, анъана руҳ бағишлайди, ғурурни мустақамлайди. Тобора такомиллашадиган мунтазамлик анъанадир. Сийқаси чиққан, эътибордан бегона доимий ҳаракат бир хилликдир.

Ҳар қандай соҳа ва тармоқ, ташкилот ва идорада бўлгани каби ижодий жамоалар саналган тахририятларнинг ҳам ўз анъаналари бор. Улар газеталарнинг қиёфасини белгилловчи омиш сифатида авлоддан авлодга, устозлардан шогирдларга ўтиб келаяпти. Бироқ азалий анъаналарни кўз қорачиқдай асрайдиган журналистлар, ўз навбатида, бир хилликдан дарров беади ва кашшофликка талпиниб қалам тебратди. Теша тегмаган мавзулар топишга интилади. XXI аср ўқувчисининг талаби ҳам шу аслида. Зотан, замон зайлига боқмай, қобилига ўрналиб қолганлар ахборот майдонидидаги ўрнини жуда тез йўқотаётганига гувоҳ бўлиб турибмиз.

Бугун азиз муштарийларга тақдим этилаётган ЯНГИ РУКН ана шундай сазй-ҳаракатлар самараси ўлароқ, яъни ҳам га-

зетхоннинг эҳтиёжига яраша "маҳсулот" сотиш, ҳам шиддатли даврнинг жиддий чақириқларига муносиб бўлиш ниятида ташкил этилди. Унда конун чиқарувчи ва ижроия ҳокимияти мутасаддилари, парламент ва маҳаллий кенгашлар депутатлари, сиёсатчи ва экспертлар, жамиятнинг ў ёки бу тизимини чуқур ўрганаётган тадқиқотчилар, воқеликларга тезкор муносабат билдирадиган тахлилчилар, танқид ва тахлилий кузатувлар тараққиётни жадаллаштиришни ёқлайдиган кенг жамоатчилик вакиллари билан ҳам турли мавзуларда баҳс-мунозараларга киришиш, ҳаётий мулоқотлар уюштириш, ҳамсуҳбатларга кутилган ва кутилмаган саволлар бериш орқали кун тартибидидаги долзарб масалаларни фуқаролик позицияси нуқтаи назаридан изчил ёритиб боришни режалаштирдик.

O'zLiDePнинг ягона расмий нашри – "XXI asr" газетасининг яна бир эзгу анъанасига айланажак янги рукннинг илк меҳмони... Келгуси сонда ўқийсиз!

БУГУНГИ СОНДА:



ҚИЙИН ДАМЛАРДА
ЭЛ-ЮРТГА
ЕЛКАДОШ,
КЎМАҚДОШМИЗ

2с.



КИМЛАРНИНГ
ПЕНСИЯСИ ОШДИ?
Бошқаларники нега
ошмади?

5с.



АВВАЛ ҚАМАЛДИ,
КЕЙИН ОКЛАНДИ
ВА БУГУН...

6с.

O'zLiDeP ФРАКЦИЯСИДА

ТАЪЛИМ ОЛИШ ВА ИШЛАШ УЧУН ҚАНДАЙ ШАРОИТЛАР ЯРАТИЛАДИ?



гайтириш, шунингдек, банкларнинг инвестициявий жозибдорлигини ошириш орқали банк секторига стратегик хорижлик инвесторларни жалб қилишга хизмат қилади. Шу жиҳатдан фракциядошларимиз билан биргаликда мазкур қонун лойиҳасини маъқулладик.

Шундан сўнг "Молиявий истеъмол кредитини ажратиш тизими такомиллаштирилиши муносабати билан "Истеъмол кредити тўғрисида"ги Ўзбекистон Республикаси қонунининг 15-моддасига ўзгартиш киритиш ҳақида"ги қонун лойиҳаси муҳокама қилинди.



Бобур БЕКМУРОДОВ,
Олий Мажлис Қонунчилик палатаси
депутати,
O'zLiDeP фракцияси аъзоси:

– Айтиш жоизки, бугунги кунда молиявий истеъмол кредитлари учун талаб ортиб бораётган бўлса-да, Ўзбекистон Республикасида ишлаб чиқарилмайдиган товарлар(хизматлар)га молиявий истеъмол кредити ажратирилиши амалдаги қонун билан чекланган. Шу боис мамлакатимиз аҳолисининг таълим олиш, меҳнат қилиш ҳамда турмуш шароитларини яхшилаш мақсадида улар учун зарур бўлган барча истеъмол товарлари (хизматлари) билан тўлақонли таъминлаш бугуннинг муҳим вазифаларидандир.

Айни қонун лойиҳаси билан шу хусусий тадбиркорликни янада ривожлантириш учун қўлай шарт-шароит ва истеъмолчи-фурқорлар учун қўшимча имкониятлар яратиш мақсадида банклар ва бошқа кредит ташкилотлари томонидан тақдим этилаётган молиявий истеъмол кредитидан фойдаланиш механизми ҳам қайтадан кўриб чиқилмоқда. Таклиф этилаётган қонун лойиҳасининг қабул қилиниши молиявий истеъмол кредитлари бериш тартибини такомиллаштириш ва содда-лаштириш, аҳолининг таълим олиш, меҳнат қилиш ва турмуш шароитларини яхшилашга хизмат қилади. Ушбу қонун лойиҳасини бугунги кундаги зарурати ва аҳамиятини ҳисобга олган ҳолда, уни янада такомиллаштириш, маромига етказиш бўйича бир қатор таклифларни билдирдик. Қизғин муҳокамалар, савол-жавоблардан сўнг ушбу ҳужжатни қўллаб-қувватладик.

Йиғилишда, шунингдек, мамлакатимиз ижтимоий-сиёсий ҳаётига дахлдор бўлган бошқа қонун лойиҳалари ҳам кўриб чиқилиб, тегишли қарор қабул қилинди.

Нурхон ЭЛМИРЗАЕВА,
"XXI asr" муҳбири

9 таси – 200 млрд. сўмдан камни ташкил этади. Киритилаётган ўзгартишлар аҳолининг ва тадбиркорлик субъектларининг банкларга омонат (депозит) жойлаштирилиши рағбатлантиради, тижорий ва бошқа кредитларга бўлган эҳтижини қондириш, шунингдек, банк хизматлари ҳажмининг ошишига ёрдам беради.



Эмма АСЛОНОВА,
Олий Мажлис Қонунчилик палатаси
депутати,
O'zLiDeP фракцияси аъзоси:

– O'zLiDeP мамлакатдаги етакчи сиёсий куч сифатида молиявий бозорнинг барқарорлигини таъминлашга йўналтирилган мўътадил қатъий пул-кредит сиёсатини юритиш, банк тизимини ислоҳ қилишни чуқурлаштириш, барқарорлиги, банклар капитализацияси ва депозит базаси даражасини таъминлаш, уларнинг молиявий барқарорлиги ва ишончилигини мустаҳкамлаш тарафдори. Партияимиз учун банк секторидан ислохотларни чуқурлаштиришдан кўзланган энг муҳим мақсад – аҳолининг банк тизимига ишончини ошириш, жамғармаларни ва уларнинг инвестицияларга ўтказилишини рағбатлантиришдир.

Мазкур қонун лойиҳасининг қабул қилиниши иқтисодий таркибий ўзгартириш жараёнларида уларнинг иштирокини кен-

Олий Мажлис Қонунчилик палатасидаги Тадбиркорлар ва ишбилармонлар ҳаракати — Ўзбекистон Либерал-демократик партияси фракциясининг навбатдаги йиғилиши бўлиб ўтди. Дастлаб депутатлар "Банклар ва банк фаолияти тўғрисида"ги Ўзбекистон Республикаси қонунига банклар устас капиталининг энг кам миқдорини босқичма-босқич оширишга қаратилган ўзгартишлар киритиш ҳақида"ги қонун лойиҳасини муҳокама қилишди.



Хазратқул ХУЖАМҚУЛОВ,
Олий Мажлис Қонунчилик палатаси
депутати,
O'zLiDeP фракцияси аъзоси:

– Мазкур ҳужжат билан "Банклар ва банк фаолияти тўғрисида"ги қонуннинг 13-моддасига банк устас капиталининг энг кам миқдорини босқичма-босқич беш юз миллиард сўмгача ошириш юзасидан тегишли қўшимчалар киритиш таклифи этилмоқда. Ҳозирда республикадаги 31 та тижорат банкдан 15 тасининг устас капитали миқдори 500 млрд. сўмдан ортиқ, 7 таси – 200 млрд. сўмдан 500 млрд. сўмгача,

МУНОСАБАТ

ҚИЙИН ДАМЛАРДА ЭЛ-ЮРТГА ЕЛҚАДОШ, КЎМАҚДОШМИЗ

Ҳаммамиз кўриб-билиб турибмиз – Ҳамиша халқ билан ҳамнафас бўлиш, халқимиз фаровонлиги ҳақида қайғуриш Президентимиз Шавкат Мирзиёев фаолиятининг бош мезони.

Яқинда давлатимиз раҳбари бошчилигида ўтказилган аҳолини энергия ресурслари билан узлуксиз таъминлаш чора-тадбирлари бўйича видео-селектор йиғилиши мамлакатимиз етакчиси халқни ташвишлантираётган масалалардан яхши хабардорлигини, одамлар мушкулни осон қилиш учун аниқ ва қатъий қарорлар қабул қилиниши яна бир бора яққол намойиш этди. "Мен совуқдан қийналаётган ҳар бир оила, ҳар бир инсоннинг ҳолатини чуқур ташвиш ва изтироб билан юрагимдан ўтказаялман," деди Шавкат Мирзиёев ва қуйидаги фикрларни ҳам алоҳида таъкидлади: "Буни ҳар бир раҳбар ҳис қилиши керак. Бу йилги совуқ бутун тизимнинг аҳолини, қишга тайёргарлик енгил-елли бўлганини кўрсатди. Энди бундай давом этиши мумкин эмас. Юзага келган вазиятни ўнглаш учун тезкор чоралар кўрамиз".

Дарҳақиқат, аномал совуқ талай ташкилотлар учун жиддий, ҳолис синов бўлди. Афсуски, айрим масъул идоралар, таъбир жоиз бўлса, имтиҳондан "ийқилди". Юртдош-

ларимизни энергия билан таъминлаш борасида ҳали камчиликлар борлиги кўзга ташланиб қолди.

Таъкидлаш зарур: мазкур йиғилишда берилган топшириқлар, албатта, партияимизга ҳам тааллуқлидир. Муайян қийинчиликлар юзага келганида O'zLiDeP доимо халқимизга кўмақдош, елкадош бўлапти, давлатимиз, ҳукуматимиз саяё-ҳаракатларига, даъватларига ҳам-оҳанг иш тутаяпти.

Шу маънода, аввало, шуни айтиш зарурки, Олий Мажлис Қонунчилик палатаси ушбу видеоселектор йиғилишида белгиланган вазифалардан келиб чиқиб, ҳудудлардаги асл ҳолатни ўрганиш юзасидан УС-лубий қўлланма тайёрлади. O'zLiDeP фракцияси аъзолари ҳам жойларда мазкур қўлланмага асосан ишга киришдилар. Услубий кўрсатмаларга мувофиқ партияимиз вакиллари ўнга яқин вазифани бажаришни бошладилар. Хусусан: совуқ об-ҳаво ту-файли вужудга келган муаммоларни ўз вақтида бартараф этиш бўйича туман ҳокимлиги мутасаддилари, сектор раҳбарлари ва масъул ташкилотлар ҳамкорлигида ташкил этилган узлуксиз навбатчилик қилинувчи "марказий штаб"ларга тушган мурожаатлар билан танишиб, баён қилинган камчиликларни зудлик билан бартараф этиш чоралари белгилангани ва амалга оширилганини

ўрганишди. Аҳолини энергия ресурслари билан узлуксиз таъминлаш бўйича кўрилаётган чоралар юзасидан ҳокимлар, сектор раҳбарлари, маҳалла раислари, ҳоким ёрдамчилари, ёшлар етакчилари ва хотин-қизлар фаоллари уйма-уй юриб, аҳолидан хабар олинганини таҳлил қилишди. Шунингдек, ҳар бир деҳқон бозоридан шароитларни яхшилаш ва нарх-навоини тартибга солиш, йирик корхоналар, ижтимоий объектлар раҳбарлари ходимларини уюшган ҳолда ишга олиб келишга автобус қатновлари йўлга қўйилганини ўрганишди...

Партияимизнинг қуйи даражадаги тузилмалари ходимлари, маҳаллий кенгашлардаги депутатларимиз, бошланғич ташкилотларимиз фаоллари ҳам бир ёқадан бош чиқариб, аёз келтириб чиқарган муаммолар билан курашишга астойдил ҳисса қўшяптилар. Фаолларимиз "Меҳр-саховат улашиш" акциялари доирасида кўчаларда йўл-патруль хизмати тизимига солаётган йўл-патруль хизмати ходимларига, йўлларни қор ва муздан тозалашта ёрдамчиликларни ўз вақтида олиб чиқиб кетаётган ободонлаштириш корхоналари ишчи-хизматчилари ва бошқаларга "Ҳорманг, бор бўлинг", дея қайноқ қаҳва, чай ва егуликлар тортиқ қилишмоқда.

Партиянинг биргина Наман-

ган ҳудудий ташкилоти томонидан ташкил этилган акция доирасида ҳомийлар кўмағида жами 427 нафар ободонлаштириш хизмати ходимларига иссиқ кийим тўплами тарқатилди. Бошқа барча ҳудудларда ҳам фаолларимиз шу сингари хайрли тадбирларни уюштиряптилар.

Нафақат кўпчилик бўлиб, балки яқка ҳолда ҳам эзгу ишларни амалга ошириш мумкин. Масалан, Олтинкўл туман кенгашида фаолият юритиётган депутатимиз Мастураҳон Абдуллаева Уйғур маҳалласидаги муҳтож оилаларга кўмир ва озиқ-овқат маҳсулотлари етказиб берди. Бошқа вилоят ва туманлардаги кўплаб оилалар ҳам депутатларимиз ҳимматидан баҳраманд бўлмоқда.

Пировардида шуни айтиш керакки, партияимизнинг бу борадаги тадбирлари шаклан турлича бўлса-да, мазмун-моҳияти муштарак – совуқ кунларда ишлаб толиққанларга, кўмакка муҳтож оилаларга руҳий ва моддий жиҳатдан далда, мадад бериш, уларга меҳр-саховат улашиш. O'zLiDeP ана шундай саяё-ҳаракатлари билан ҳар қандай шароитда ҳам эл-юрт ташвишини ҳис этиб, Ҳамиша ёрдамга шайлигини намоян бўляпти.

O'zLiDeP матбуот хизмати

МУЛОҚОТ



O'zLiDeP етакчиси ҳарбий хизматчилар ҳузурида

Олий Мажлис Қонунчилик палатаси Спикери ўринбосари, O'zLiDeP фракцияси раҳбари Ақтам Хаитов Ватан ҳимоячилари кўни байрами нишонланган кўнлари Термиз гарнизонидаги ҳарбий қисмлардан бирида бўлиб, хизматчилар билан учрашди.

Партия етакчиси сўзи аввалида Ўзбекистон Республикаси Қуролли Кучлари ташкил этилганининг 31 йиллиги ҳамда Ватан ҳимоячилари кўни муносабати билан барча ҳарбий хизматчиларни самимий табриклади.

Мулоқот давомида бугунги кунда қонунчилигимиздаги ўзгаришлар, хусусан, ҳарбий хизматчилар учун берилаётган имтиёз ва имкониятлар, тизимдаги янгиликлар хусусида сўзлаб берди. Ўз навбатида, ҳарбий хизматчилар ҳам бу борада ўзларини қизиқтирган саволларга жавоб олишди.

Учрашув ниҳоясида ҳарбий қисм кутубхонаси учун тарихий ва бадиий китоблар совға қилинди.

– Бугунги кунда ҳарбийлар учун кўплаб имкониятлар яратилаётгани ҳеч бизни қувонтиради, — дейди ҳарбий қисм командирининг тарбиявий ва мафкуравий ишлар бўйича ўринбосари, капитан Хуршидjon Исмоилов. — Биргина мисол, қисимимизда ўз йиғитлик бурчини ўтаётган 10 нафар хизматчи ўтган йили ипотека кредити асосида янги қурилган замонавий уй-жой билан таъминланди. Яна 15 нафар ҳарбий хизматчининг фарзандлари имтиёзли квота асосида олий ўқув юрлари талабалари бўлишди.

Ақтам Хаитов учрашувдан сўнг ҳарбий қисмдаги шарт-шароитлар билан танишди. Бу ерда хизматчилар учун аутсорсинг тизимида ишга туширилган минг кишилик ошхона, иситиш тизими билан таъминланган ётоқхона, жисмоний тайёргарлик учун замонавий спорт зали ва ўқув хонаси, маданий ҳордиқ чиқаришлари учун ҳам шароит яратилганига гувоҳ бўлди. Яна кутубхона, маънавият бурчаклари ҳам ташкил қилинган бўлиб, ҳарбийлар у ерда китоб ўқишлари, соҳага оид адабиёт, журнал ва газета муталааси билан шуғулланишлари мумкин.

Қиймати 3 миллион АҚШ доллариллик корхона қандай ишляпти?

Олий Мажлис Қонунчилик палатаси Спикери ўринбосари Ақтам Хаитовнинг навбатдаги манзили Термиз шаҳридаги Жўйжангал маҳалласида жойлашган "Glass-expo" МЧЖ бўлди.

Корхона ҳозирда кўнига 300-400 кв. м. ўлчамдаги ойнани қайта ишлаб чиқариб, маҳаллий бозорга йўналтирмоқда. Бунинг учун Хитой, Россия ва Италиядан келтирилган ускуналар қўл келмоқда.

– Қиймати 3 миллион АҚШ доллари миқдорига эга бўлган ушбу корхона 2020 йилда ишга туширилган эди, — дейди унинг раҳбари Қувондиқ Арлаков. — Ҳозирги кунда 30 нафардан ортиқ ишчи меҳнат қилмоқда. Улар учун барча зарур шароитларни яратганмиз. Келгусида корхонаимизнинг тўлиқ қувват билан ишлаши учун қўшимча ускуналар келтириб, фаолиятини янада кенгайтирмоқчимиз.

Партия лидери корхонадаги ишлаб чиқариш жараёни билан танишар экан, тадбиркорни қийнаётган муаммолар билан ҳам қизиқди ва ўзининг зарур маслаҳат ҳамда тавсияларини бериб ўтди.

O'zLiDeP Сурхондарё вилояти кенгаши
матбуот хизмати



O'zLiDeP матбуот хизмати

ИҚТИСОДИЙ РИВОЖЛАНИШ ХАЛҚ ФАРОВОНЛИГИНИ ТАЪМИНЛАЙДИ

◀◀ Бошланиши 1-саҳифада.

2023 йилдан туман ва шаҳарлар тадбиркорлик учун ҳар томонлама ривожланган, инфратузилмаси яхши, шароити нисбатан қонуқарли, жозибадорлиги етарли бўлмаган ва шароити оғир бўлган тоифаларга ажратилади. Бунда айланмадан олиннадиган солиқ, фойда солиғи, ижтимоий солиқ ставкалари тоифадан келиб чиқиб белгиланади. Янги тартибга асосан, шароити оғир ҳудуддаги тадбиркорлар ер ва мол-мулк солиқлари бўйича ҳисобланган сумманинг атиги 1 фоизини тўлайди. Яқка тадбиркорлар қатъий ставкадаги солиқларни тўлашдан озод этилади. Кредит олишда ҳам маълум фоиз ставкалари қўлланиб, инфратузилма ҳолатларини давлат томонидан қоплашда бир қатор энгилликлар берилади.

Бизнесга солиқ юкни камайтириш бўйича ишлар давом эттирилиб, жорий йил 1 январдан бошлаб қўшилган қиймат солиғи ставкаси 15 фоиздан 12 фоизга пасайтирилди. Бунинг натижасида камидан 14 триллион сўм маблағ тадбиркорлар ихтиёрида қолади.

Биламизки, инвестициясиз иқтисодиёт ривож топмайди. Рақамларга мурожаат қиладиган бўлсак, сўнгги олти йилда инвестициялар ҳажми ялпи ички маҳсулотнинг 30 фоиздан ошди. 2023 йили қарийб 30 миллиард доллар сармоя жалб қилинади, шундан 25 миллиард доллар хусусий инвестициялар бўлади.

Янги Ўзбекистоннинг тараққиёт стратегиясида 2030 йилга бориб жон бошига ҳисоблаганда Ўзбекистоннинг аҳоли даромадлари ўртача кўрсаткичдан юқори бўлган давлатлар қаторига кириши мақсад қилинган. Бунга хусусий секторни рағбатлантириш ва унинг улушини ошириш, тўғридан-тўғри хорижий инвестицияларни жалб этиш орқали эришиш кўзда тутилган. Шунингдек, мамлакатда инвестиция муҳитини янада яхшилаш ва унинг жозибадорлигини ошириш, келгуси беш йилда 120 миллиард АҚШ доллари, жумладан, 70 миллиард доллар хорижий инвестицияларни жалб этиш чораларини кўриш, давлат-хусусий шериклик асосида энергетика, транспорт, соғлиқни сақлаш, таълим, экология, коммунал хизматлар, сув ҳўжалиги ва бошқа соҳаларга 14 миллиард АҚШ долларига тенг инвестиция жалб этиш, республика ҳудудлари ва хорижий мамлакатлар бизнес вакиллари ўртасида ташқи иқтисодий алоқаларни ўрнатиш кўзланган.

Рақамларга эътибор қаратсак, охириги беш йилда иқтисодиётимизга жалб қилинган иллик хорижий инвестициялар ҳажми 3,5 баробар ошди, умумий қиймати 25 миллиард долларни ташкил этди. Бунинг ҳисобидан 59 мингта инвестиция лойиҳаси амалга оширилгани бос мамлакатимизда 2,5 миллиондан ортиқ янги иш ўрни яратишга эришилди. Умуман олганда, ўтган беш йил давомида олиб борилган ислохотлар ўз ижобий натижаларини берди. Иқтисодиётнинг иллик ўртача ўсиши – 5 фоизни, sanoat соҳасида эса 8 фоизни ташкил этгани ҳам бунинг яққол исботидир.

Ўзбекистон яқин йилларда Жаҳон савдо ташкилотига тўлақонли аъзо бўлиш учун аниқ қадамлар қўймоқда. Ҳозирнинг ўзида республикаимизда маҳсулот ишлаб чиқарувчилар эркин савдо орқали 280 миллион истеъмолчиси бўлган минтақавий бозорларга чиқиш имкониятига эга. Бундан ташқари, Европа Иттифоқининг кенгайтирилган преференциялар тизими “GSP+” доирасида Ўзбекистондан 6 мингдан ортиқ маҳсулот турларини Европа бозорига имтиёзли шартларда экспорт қилиш мумкин. Мавжуд транспорт коридорларини диверсификация қилиш мақсадида Ўзбекистонда ишлаб чиқарилган маҳсулотларни Трансафғон темир йўли орқали Жанубий Осиёга, Ўзбекистон – Қирғизистон – Хитой темир йўли орқали Осиё – Тинч океани минтақасига ҳамда Жанубий Кавказни кесиб ўтадиган мультимодал транспорт коридори орқали Европа мамлакатларига етказиш учун имкониятлар яратиш бўйича ҳам амалий ҳаракатлар олиб борилаятгани ҳаммаимизга яхши маълум.

Тан олиш керак, халқаро экспертлар Ўзбекистон-

нинг инвестицияларни жалб этиш, иқтисодиётни либераллаштиришдаги қадамларини эътироф этмоқда. Ўзбекистоннинг очиқлик сиёсати Фарбий Европа ва Марказий Осиё ўртасидаги ўзаро муносабатларни ривожлантириш гаровидир. Ўзбекистон “GSP+” статусини олган бўлиб, айна чоғда мамлакатни Европада яхши билишади.

Ўзбекистоннинг хорижий инвестицияларни жалб қилишга қаратилган сиёсати бутун Марказий Осиёга бўлган қизиқишни янада оширди. Бу сиёсат натижасида йўлга қўйилган халқаро Тошкент инвестиция форуми эса бутун Марказий Осиё минтақасида иқтисодиётга хорижий инвестиция ва замонавий технологияларни жалб этиш, минтақа тадбиркорлари билан хорижий ишбилармон доиралар ўртасида тўғридан-тўғри алоқаларни ўрнатиш учун доимий платформага айланмоқда. Чунки Марказий Осиё – ягона иқтисодий макон ва ягона инвестиция бозоридир.

Президентимиз Шавкат Мирзиёев Олий Мажлис ва Ўзбекистон халқига Мурожаатномасида мамлакатимиз тараққиёти йўлида амалга оширилаятган ислохотларни теран таҳлил қилди ҳамда истиқболдаги долзарб вазифаларни белгилаб берди. Мазкур тарихий ҳужжатда юртимиздаги ҳар бир соҳани ривожлантиришга қаратилган муҳим тақдир ва ташаббуслар илгари сурилди. Уларнинг рўёби халқимизнинг азалий орузси – янада фаровон ҳаёт сари етаклайди.

26 миллиондан ортиқ аҳолиси бўлган Ўзбекистон Марказий Осиёнинг иқтисодий ривожланишида муҳим роль ўйнайди. 2030 йилга бориб Ўзбекистон Шарқий Европа ва Марказий Осиё минтақасида ишчи кучи бўйича бешинчи ўринга эга бўлади. Шу боис ривожланиш тенденцияларини сақлаб қолиш ва унинг ўсиши учун таълимни ислох қилишга катта эътибор қаратилган. “Инсонга эътибор ва сифатли таълим йили” деб ном берилган жорий йилда илм-фан ва инновацияларга 1,8 триллион сўм йўналтирилади. Шунингдек, бошланғич синф ўқувчилари бепул овқатланиши учун 2,3 триллион сўм ажратилади.

Ўзбекистон инсон капитали борасида юксак салоҳиятга эга давлат. Бу тизимга киритилган инвестиция ҳам истиқболли. Зеро, келгуси беш йилда мактабга таълим соҳасида 7 мингдан зиёд янги муассасалар ташкил этиш орқали қамров даражасини ҳозирги 67 фоиздан 80 фоизга етказиш, мактаб таълими тизими учун ўқув дастурлари ва дарсликларни илғор хорижий тажриба асосида тўлиқ қайта ишлаш ва қўшимча 1 миллион 200 минг ўқувчи учун янги мактаблар барпо этиш, олий таълим соҳасидаги қамров даражасини 50 фоизга етказиш белгиланмоқда. Мақсад иқтисодиётнинг драйвер тармоқларини малакали мутахассислар билан тўлиқ таъминлашдан иборат.

Аҳолимизнинг турмуш шароитини яхшилаш ва фаровон ҳаёт кечирини таъминлаш бугунги кунда долзарб аҳамият касб этади. Қишлоқ жойлардаги мавжуд ижтимоий муаммоларни ҳал этиш, ишсизлик ва камбағалликка барҳам бериш каби масалалар ислохотлар кўламини кенгроқ олишни тақозо қилади. Шу боис сўнгги йилларда ер муносабатлари бўйича катта ишлаб бoшланди. Биргина ўтган йили 100 минг гектар экин майдони аҳолига деҳқончилик қилиш учун очиқ электрон танлов орқали ижарага берилди. Бу бугунги геосиёсий вазият, экологик инқироз, сув танқислиги ва иқлим ўзгаришлари натижасида юзага келган бир шароитда 1,5 миллион тонна қўшимча озиқ-овқат етиштириш имконини яратди. Шунингдек, аҳолининг муҳим даромад манбаига эга бўлишида, озиқ-овқат танқислигининг олдини олиш ва нархларнинг барқарорлигини таъминлашда муҳим омил бўлди.

Ўртдошларимизнинг фидокорона меҳнати натижасида ҳозирги кунда Ўзбекистон узум, полиз экинлари, мевалар етиштириш ва экспорт қилиш бўйича жаҳондаги етакчи мамлакатлар қаторига кирди. Қишлоқларда ташкил қилинган 400 мингта янги деҳқон хўжаликлари 1 миллион 200 мингдан зиёд одамлар бандлигини таъминлашга хизмат қилди. 2023 йили ҳам 100 минг гектар

қўшимча экин майдонларининг аҳолига ажратилиши кўзда тутилган ва қарийб 350 мингта янги деҳқон хўжалиги ташкил этилиши белгилаб олинган.

Дарҳақиқат, Ўзбекистонда инсон қадрини оширишга қаратилган улкан мақсадлар йўлида ислохотлар жадал амалга оширилмоқда. Айниқса, 2026 йилгача аҳоли ўртасида камбағалликни икки баравар камайтириш, шунингдек, 2030 йилга бориб даромад даражаси ўртачадан юқори бўлган давлатлар қаторига қўшилиш кўзда тутилган. Бунинг учун ЯИМнинг ўсиш суръатлари ҳозирги даражадан анча юқори бўлиши талаб қилинади.

Амалга оширилаятган ислохотларда хусусий сектор ўсишини рағбатлантириш ва барқарор иш ўринларини яратиш, давлатнинг иқтисодиётдаги ролини ислох этиш, фуқаролар манфаатларига ва инсон капиталини ривожлантиришга хизмат қиладиган дастурларга инвестиция киритиш, экологик барқарор келажакни барпо этишга устувор аҳамият қаратилаятганини алоҳида таъкидлаш жоиз.

Иқтисодиёт барқарорлигини таъминлашнинг кафолати бўлган инсон капиталини ривожлантириш қўлга киритилаядиган ютуқларнинг салмоқли бўлишига хизмат қилади. Шу боис таълим сифатига алоҳида эътибор қаратилиб, Ўзбекистонда замонавий воқелик ва тенденцияларни ҳисобга олган ҳолда рақамли иқтисодиётга ўтиш бошланди. 2017–2021 йилларга мўлжалланган Ҳаракатлар стратегияси асосида рақамли иқтисодиёт ва “электрон ҳукумат”ни ривожлантириш борасида кенг кўламли вазифалар ва лойиҳалар амалга оширилди.

Бугунги кунда рақамли иқтисодиётнинг мамлакат ЯИМдаги улуши 2,2 фоизни ташкил этмоқда. “Рақамли Ўзбекистон – 2030” стратегияси ва уни амалга ошириш орқали рақамли иқтисодиётга ўтишнинг ҳуқуқий асослари яратилди. Буни Ўзбекистоннинг замонавий иқтисодиётини яратиш ва шу орқали жаҳон иқтисодий тараққиёти тамойиллари билан мослаштиришга қўйилган яна бир ҳам ҳуқуқий, ҳам амалий қадам дейиш мумкин. Чунки рақамли иқтисодиёт негизида креатив иқтисодиёт, яъни тинимсиз яратувчанликка таянган иқтисодиёт турибди.

Ўзбекистон барқарор ривожланиш ва рақобатбардош иқтисодиётни шакллантириш учун рақамли иқтисодиётни ҳаётга татбиқ этиш ва ижтимоий-иқтисодий ҳаётнинг барча жаҳасига сингдириш йўлидан бормоқда. Бу қадамлар тактик эмас, балки стратегик аҳамиятга эга бўлиб, узоқ йилларни ўз ичига олади. Мамлакатимизда рақамли индустрияни жадал ривожлантиришдан кўзланган асосий мақсад миллий иқтисодиёт тармоқлари рақобатбардошлигини оширишга қаратилган.



Нодир ЖУМАЕВ,
Олий Мажлис Қонунчилик палатаси
депутати, О'зЛиДеР фракцияси аъзоси
иқтисодиёт фанлари доктори, профессор



Элмурод ҲОШИМОВ,
Банк молия академияси ректори в.б.,
иқтисодиёт фанлари доктори

“O'zLiDeP YOSHLAR MINBARI” ҚИЗИРИҚЛИК ТИКУВЧИДАН НУКУСДАГИ ЧИЛАНГАРГАЧА ШУ ЛОЙИҲА ОРҚАЛИ ҚАТОР МУАММОЛАР ИЖОБИЙ ҲАЛ ЭТИЛМОҚДА

Ёшлар муаммоларига тезкорлик билан муносабат билдириш ва имкон қадар оқилона ечим топиш бугунги куннинг устувор йўналишларидан бири ҳисобланади. Айниқса, йигит-қизлар бандлигини таъминлаш орқали доимий даромад манбаига эга бўлишларига кўмаклашиш давлат ва жамоат ташкилотларининг долзарб вазифасидир.

Янги Ўзбекистонда ёшлар билан ишлашнинг ўзи хос механизмлари жорий этилиши билан бошқарувнинг вертикал тизими яратилгани натижа бераётгани ҳеч кимга сир эмас. Бироқ ҳали қилиниши керак бўлган ишлар ҳам бир дунё. Бунда масъул идоралар вакиллари-нинг жонбозлиги ҳар қачонгидан-да муҳим аҳамият касб этаётди.

Тадбиркорлар ва ишбилармонлар ҳаракати – Ўзбекистон Либерал-демократик партияси томонидан ёшлар муаммоларини вақтида аниқлаш ва уларни чуқур таҳлил қилиш, мурожаатларни қисқа муддатларда кўриб чиқишга жиддий эътибор берилаятгани замирида худди шундай мақсад мўжжасам. Хусусан, партия ташаббуси билан ташкил этилган “O'zLiDeP YOSHLAR MINBARI” телеграм гуруҳида ёшларга оид масалалар бўйича жамланаётган таклифлар мутахассис ва экспертларнинг мулоҳаза чиғириғидан ўтказилаётгани уларнинг ижобий ҳал этилишида қўл келмоқда.

Махсус телеграм канали очилганига кўп бўлган йўқ. Лекин ўтган икки ой давомида мазкур гуруҳга аъзо бўлган икк мингга яқин ёшлардан жами 130 дан ошиқ турли мазмундаги мурожаатлар келиб тушди ва аксариятига тезкор ечим топилди.

Сирдарё вилояти Гулистон туманида истиқомат қилувчи Жавлон Хусановнинг Шодлик маҳалласига кириш қисмига ўрнатилган светофорнинг анчадан буён ишламаслиги юзасидан йўллаган мурожаатини ўрганишга партиядан сайланган депутатлар ҳам ёрдам берди. O'zLiDeP Сирдарё вилоят кенгаши Ёшлар ва бизнес тузилмалари билан ишлаш бўлими мудири Ҳ.Жабборов, партиянинг Гулистон туман кенгаши раиси, маҳаллий кенгаш депутати Н.Хусанов ушбу масалани мурожаат муаллифи ва тегишли масъуллар иштирокида жойида кўриб чиқишди. Ижроия органларини жалб қилган ҳолда амалга оширилган чора-тадбирлар туфайли светофор ишлади.

Навоий вилояти Кармана туманида яшовчи талаба Шаҳноза Ражабова контракт пулини тўлаш учун амалий ёрдам сўраб қилган мурожаатини ҳам мутасаддилар дарров ўрганди. Натижада шартнома суммасининг ярои ёшлар жамғармаси ҳисобидан тўланди.

Сурхондарё вилояти Қизирқ тумани Қончиқиш маҳалласидан Саида Тойлоқованинг субсидия асосида тикув машинаси ажратиш бўйича қилган мурожаати O'zLiDeP туман кенгаши аппарат раҳбари Д.Бердиева ҳамда ҳоким ёрдамчиси ҳамкорлигида ижобий ҳал этилди. Саида бугун ўзи истаганидай янги тикув машинасида ишляпти.

Олтинсой туманида истиқомат қилувчи Ш.Маматов Термиз иқтисодиёт ва сервис университетига ўқишга қабул қилинганлиги, бироқ таълим кредити олишда муаммага дуч келаятганини билдирган эди. O'zLiDeP Сурхондарё вилоят кенгаши ва “Ипотека банк”нинг Термиз филиали ҳодимларининг савй-ҳаракати билан 12 миллион сўмлик таълим кредит вақтида ажратилди.

Қорақалпоғистон давлат университети физика факультети талабаси Нурбатир Эдилбеков дарсдан бўш вақтларида чилангарлик йўналишида қўшимча таълим олишга кўмаклашиш юзасидан мурожаат қилганди. Ушбу мурожаат ҳам партиядан Қорақалпоғистон Республикаси Кенгаши масъуллари томонидан қисқа муддатда ижобий ҳал этилди.

Бундай мисолларни яна кўплаб келтириш мумкин.

Аслида телеграм канали очиш ва навқирон авлоднинг тақлифларини жамлашдан мақсад ҳам мавжуд муаммоларни партиявий йўл орқали ўрганиш ва уларга масъуллар эътиборини қаратган ҳолда ечим топишдан иборат.



Жамшид ЖАЛОЛОВ,
O'zLiDeP Сийсий Кенгаши Ижроия қўмитаси
Ёшлар билан ишлаш бўлими мудири

ХУДУДЛАРДАН ХАБАРЛАР

АНОМАЛ СОВУҚ ОДАМИЙЛИК, МЕХР-САХОВАТ ТАФТИГА ТАЪСИР ЭТОЛМАЙДИ

БУ ЙИЛГИ ҚИШНИНГ ҚИРОВЛИ, АЁЗЛИ КУНЛАРИ ХАЛҚИМИЗ ИРОДАСИ ВА МЕХР-ОҚИБАТИНИ ЯНА БИР БОР СИНОВДАН ЎТКАЗЯПТИ. НОҚУЛАЙ ОБ-ҲАВО ШАРОИТИДА ХАМ ЎЗ ВАЗИФАСИНИ СИДҚИДИЛДАН АДО ЭТАЁТГАН СОҲАЛАР ВАКИЛЛАРИГА КЎМАК БЕРИШ, УЛАРНИ ҚЎЛЛАБ-ҚУВВАТЛАШ МАҚСАДИДА ЮРТИМИЗ БЎЙЛАБ ТУРЛИ ТАШКИЛОТ ВА МУАССАСАЛАР ТОМОНИДАН САХОВАТ АКЦИЯЛАРИ ТАШКИЛ ЭТИЛМОҚДА, ЁРДАМГА МУХТОЖ АҲОЛИ ВАКИЛЛАРИ ҚОЛИДАН ХАБАР ОЛИНИБ, ЁРДАМ КЎРСАТИЛМОҚДА.

ТАДБИРКОРЛАР ВА ИШБИЛАРМОНЛАР ХАРАКАТИ – ЎЗБЕКИСТОН ЛИБЕРАЛ-ДЕМОКРАТИК ПАРТИЯСИНИНГ ЖОНКУЯР, ФИДОЙИ ФАОЛЛАРИ ХАМ АЙНИ ШУ АКЦИЯДА ФАОЛ ИШТИРОК ЭТЯПТИ.

ҲЕЧ КИМ ТОМОШАБИН ЭМАС

Қаранг, шундай об-ҳавода ҳам ободонлаштириш ходимлари тиним билмади. Йўлакларни қордан тозалаб, музламалар ҳосил бўлмаслиги, юртдошларимиз хавфсиз ҳаракатланиши учун астойдил меҳнат қилди, томошабин бўлиб ўтирмади.

Республикамиз бўйлаб кенг қулоч ёйиб бораётган меҳр-саховат улашиш акцияси доирасида О'zLiDeP Сирдарё вилоят кенгаши, ўзбекистон ёшлар иттифоқи вилоят кенгаши, Ёшлар ишлари агентлиги вилоят бошқармаси ҳамда кўнгилли ёшлар жонбозлик кўрсатаётган ободонлаштириш ходимларига иссиққина қаҳва ва ширинликлар улашди.

Хусан ЖАББОРОВ,
О'zLiDeP Сирдарё вилоят кенгаши
бўлим мудир

ҲА, ДЕГАН ТУЯГА МАДАД

Аёзли кунларда ўз ўрнида мардонатор туриб, халқимизга хизмат қилаётган ИПХ ходимлари, ободонлаштириш тизими ишчи-хизматчилари меҳнати таҳсинга сазовор.

О'zLiDeP Қашқадарё вилоят кенгаши ходимлари йўл ҳаракати хавфсизлиги ходимлари, йўлларни қор уюмлари, музлардан тозалаётган ободонлаштириш корхонаси ишчилари учун ташкил этилган меҳр-саховат улашиш акциясида фаол қатнашмоқда.

Қарши шаҳрида партия фаоллари ана шу фидоийларга ва аҳолига иссиқ қаҳва улашиб, оз бўлса-да, уларга мадад бўлишига ҳисса қўшмоқда.

О'zLiDeP Қашқадарё вилоят кенгаши
матбуот хизмати

БИРЛАШГАН ЎЗАР ЭКАН

Доно халқимизнинг сермаъно мақоли яна бир бор ўз исботини топяпти. Шу кунларда Бухоро вилоятида ҳам аномал совуқ ҳаво ҳукм сурмоқда. Шундай пайтда эл-юртимиз бир бўлиб, аёзли кунлардан беталафот ўтишга ҳаракат қилаётгани кувонарли.



Зиммасидаги масъулиятни бажаришига на қор, на изғирин халал берадиган соҳа вакилларига қўйил қолмай илож йўқ. Ана, бир томонда ободонлаштириш бошқармаси, бир томонда хизмат кўрсатиш соҳаси ходимлари бел боғлаб ўз вазифини бажаришга киришган.

О'zLiDeP Бухоро вилоят ва Бухоро шаҳар кенгаши ходимлари ҳамда партия фаоллари шундай ходимлар ва аҳоли учун меҳр-саховат улашиш акцияси ташкил этишди.

О'zLiDeP Бухоро вилоят кенгаши
матбуот хизмати

БЕРГАНИ БЕМИННАТ БУ ЭЛНИНГ

О'zLiDeP Навоий вилояти ҳудудий партия ташкилоти ходимлари, Халқ депутатлари Кармана туман кенгашидаги партия депутатлик гуруҳи раҳбари Ю.Муродов билан бир-

галикда меҳр-саховат улашиш акцияси доирасида ҳудуддаги бир қанча муассасаларга озиқ-овқат маҳсулотлари ҳамда ош тарқатилди.

Дастлабки манзил Навоий шаҳри "Тинчлик" МФЙ ҳудудидаги доимий яшаш жойига эга бўлмаган ҳамда оила-сида ногиронлиги мавжуд бўлган оила хонадонлари бўлди. Бу ерда истиқомат қилаётган 30 дан ортиқ оиланинг ҳолидан хабар олиниб, озиқ-овқат маҳсулотлари тарқатилди.

Сўнгра Кармана тумани Тиббиёт бирлашмасига қарашли Тез тиббий ёрдам бўлимида хизмат қилаётган ҳамшира ва шифокорлар ҳамда қозонхона хизматчиларига иссиқ овқат ва қайноқ қаҳва улашилди.



Шу кеча-кундузда ноқулай об-ҳаво ҳукмрон бўлиб турган бир шароитда аҳолига электр энергиясини узлуксиз етказиб беришда соҳа ходимлари зиммасига жиддий вазифа юкланган. Партия фаоллари ўтказилган акция давомида Кармана туман Электр тармоқлари корхонасида фаолият юритаётган штаб навбатчилигидаги ходимлар билан учрашиб, улар учун бепул тушлик ташкил этишди.

Сўнгги манзил Кармана тумани Арғун маҳалласида истиқомат қилаётган оила бўлди. Бу хонадонда туғма нуқсон бор икки ногирон истиқомат қилади. Уларга партия фаоллари томонидан дори-дармон ва озиқ-овқат маҳсулотлари топширилди.

Бундай тадбирлар ҳудудлар бўйлаб кенг ёйилиб, анъанага айланмоқда.

О'zLiDeP Навоий вилоят кенгаши
матбуот хизмати

ЖОНГА ОРА КИРАР ЯХШИЛАР

Ижтимоий соҳа объектлари таъминоти ва кам таъминланган аҳолига беғараз ёрдам кўрсатишда партияимиз фаоллари илғор.

Хусусан, О'zLiDeP Ургут туман кенгаши раиси Жамшид Ҳайдаров раҳбарлигидаги "Ургут" эркин иқтисодий зонасида фаолият кўрсатаётган партия фаоллари бўлган тадбиркорлик субъектлари томонидан ижтимоий соҳа объектлари (мактаблар), мухтож оилаларга ҳамда вилоят ва туманда ташкил қилинган штабларга турли хилдаги ҳоимийлик ёрдамлари кўрсатишмоқда.

Жумладан, вилоят штабига 350 млн. сўм пул маблағи ҳамда 20 минг жуфт пайпоқ, туман штабига 1 000 кг ўсимлик ёғи, 10 тонна кўмир ва тумандаги 1-умумтаълим мактабига ҳам 10 тонна кўмир, туманининг Қуйи Гузар, Чорраҳа, Гўзни маҳаллаларидаги кам таъминланган аҳоли хонадонларига 10 500 кг кўмир ёқилғиси етказиб берилди.

Шунингдек, Боғишомол маҳалласида яшовчи кам таъминланган, ногиронлиги бўлган, эҳтиёжманд 20 та хонадоннинг ҳар бирига 500 минг сўмдан жами 10 миллион сўм нақд пул кўринишида кўмак кўрсатилди.

Ж.ХЎЖАМҚУЛОВ,
О'zLiDeP Самарқанд вилоят кенгаши
бўлим мудир

ЙЎЛОВЧИЛАР ҲАМ МАМНУН

Айни кунларда О'zLiDeP Жиззах вилоят кенгаши фаоллари ҳам хайрли ташаббусга қўл уришди.

Жиззах шаҳри кўчаларида партия фаоллари томонидан исиниш хоналари ташкил этилди. Мазкур масканларда йўловчилар партия фаоллари томонидан тақлиф қилинган иссиқ қаҳва ичиб, исиниб олиш имкониятига эга бўлмоқдалар.



– Зарурият билан кўчага чиққан эдим, – дейди йўловчилардан бири Сабоҳат Йўлдошева. – Очиғи, анчагина совқотгандим. О'zLiDeP фаоллари тақлиф қилган иссиқ қаҳва айна муддао бўлди. Эътибордан мамнунмиз.

Партия фаоллари, волонтерлар шаънига айтилган бу каби миннатдорчилик сўзларини эшитар эканмиз, йўловчиларнинг нафақат қаҳва ва исиниш хоналаридаги бир муддатли ҳордиқ онларидан, балки кўрсатилган эътибордан қалбларига илиқлик югурганини сезиш қийин эмасди.

О'zLiDeP Жиззах вилоят кенгаши
матбуот хизмати

САВОБ

ДЕПУТАТ ТАШАББУСИ БИЛАН МАКТАБ ТАЪМИРЛАНДИ



Бувайда туманидан сайланган Олий Мажлис Қонунчилик палатаси депутати Мавлуда Ибрагимовага сайловчилари мурожаат этиб, тумандаги 24-умумтаълим мактабини таъмирлаб беришда амалий ёрдам беришини сўрашган эди.

– Хабарингиз бор, ҳар ойда парламент вакиллари ўз сайлов округларида бўлиб, сайловчиларнинг муаммоларини ўрганади, – дейди депутат М. Ибрагимова.

– Утган йили 24-мактаб фаолияти билан обдан танишган эдим. Мактаб маъмурияти, ўқитувчилар ва ота-оналар билан суҳбатлашар эканман, ушбу таълим даргоҳи таъмирлаб аҳволга келиб қолгани, ўқувчилар совуқ кунларда анча қийналишавтгани маълум бўлди. Тўғриси, кирмаган эшигим, мурожаат қилмаган ташкилотим қолмади. Сабаби, ҳар гал сайловчилар билан учрашганимда шу муаммо қайта-қайта тақдорланаверарди. Ниҳоят саъй-ҳаракатимиз зое кетмади, муаммо ҳал этилди.

Мавлудахон Ибрагимова ташаббуси билан мазкур мактабни таъмирлаш ишлари давлат дастурига киритилиб, ҳозирги кунда муассаса биноси тўлиқ капитал таъмирланди. Ушбу жараёнда Бувайда тумани ҳокимлиги ҳам ташаббус кўрсатди. Ҳамжихатликда қилинган эзгу ишлар натижасида эндиликда ўқувчилар кенг, ёруғ, иссиқ хоналарда таълим-тарбия олишади.

Таъкидлаш жоизки, мазкур мактаб 1176 ўринга мўлжалланган бўлса-да, бугунги кунда 1200 ўқувчи таҳсил олади. Мактаб биносидида болалар учун спорт заллари, ўқув ишлар натижасида эндиликда ўқувчилар ҳам мавжуд. Бино яқин кунларда фойдаланишга топширилиши режалаштирилган.

Мафтуна ҚЎЛДОШОВА,
Олий Мажлис Қонунчилик палатаси
депутати ёрдамчиси

ФАОЛЛАРИМИЗ



МАҚСАДЛАРИ УЛҚАН МУҚАДДАМ ОПАНИНГ

О'zLiDeP сафида узок йиллардан бери самарали меҳнат қилиб келаётган партия Ангрэн шаҳар кенгаши раисининг биринчи ўринбосари – аппарат раҳбари Муқаддам Норбоева давлат ва жамият ҳаётида ўзининг мустақам сиёсий позицияси ва чуқур ҳуқуқий билимга эга фаоллардан бири.

Ангрэн шаҳрини барқарор ижтимоий-иқтисодий ривожлантириш, партиянинг дастурий ғоя ва мақсадларини рўйбга чиқариш йўлида камарбаста бўлиб, халқнинг дарду ташвиши билан яшаётган Муқаддам опани ҳудуддаги ёш қари бирдек ҳурмат қилади. Ёшлар, хотин-қизларнинг янги ғоя ва ташаббуслар билан чиқишлари, тадбиркорлик фаолиятини қўллаб-қувватлаш, мамлакатимизда амалга оширилаётган саъй-ҳаракатлар, ўзгаришлар ва ижтимоий-сиёсий жараёнларда уларнинг фаол иштирок этишларини таъминлашда ҳам жуда катта жонбозлик кўрсатиб келмоқда.

Айниқса, шаҳардаги "Аёллар маслаҳат маркази", "Shahliya" масъулияти чекланган жамияти сингари ташкилотлар билан фаол ҳамкорликни йўлга қўйиб,

уларда ҳудудда истиқомат қилувчи касб-хунарсиз бўлган, ишсиз, уй-жойсиз, кам таъминланган, ижтимоий ҳимояга мухтож хотин-қизларнинг қобилият ва салоҳиятларини намоиш этишлари учун шарт-шароит яратиш келмоқда. Хусусан, биргина 2022 йилнинг ўзида Муқаддам Норбоеванинг ташаббуси ва бевосита кўмаги билан 40 дан ортиқ хотин-қиз "Shahliya" маъсулияти чекланган жамиятида тикувчилик, пазандлик, сартарошлик сингари касб-хунарларга ўқитилиб, айни дамда тадбиркорлик фаолиятларини бошлашди.

Бугун Муқаддам опанинг бошчилигида Ангрэнда "Давлат – инсон учун" деган эзгу ғоя ҳаётга татбиқ этилиб, ҳар бир фуқаро учун муносиб турмуш шароити ва ижтимоий ҳимоя тизими яратиш йўлида тизимли ишлар амалга оширилмоқда. Биргина, Ангрэн шаҳри ҳокими Алишер Райимов тақлиф этилган партия депутатлик гуруҳи эшитиш-да жонкуяр Муқаддам Норбоева шаҳар мутасаддилари олдида ҳудудда аёллар учун иш яратиш, бандлигини таъминлаш, уй-жойга мухтож аёлларнинг тураржойи билан таъминланиши масалаларини кўндалан қўйди. Қисқа вақтда эшитув ижобий натижасини кўрсатиб, мазкур масалалар ўзининг ижобий ечимини топа бошлади. Муқаддам опа Ангрэнда тиб-

бий хизмат сифатини ошириш, бу борада хусусий секторнинг ролини кучайтиришда ҳам қатор ибратли ишлари амалга ошириб келмоқда. Пурвиқор тоғлар орасида жойлашган "Янгиобод" санаторийси ва бошқа хусусий тиббиёт масканлари билан ҳам самарали ҳамкорликни йўлга қўйган.

Жамият ва давлатнинг барқарор тараққиётида аёлнинг ўрни, унинг сиёсий ва ҳуқуқий маданияти алоҳида аҳамият касб этади, деб билувчи Муқаддам опа бу борадаги тарғибот ишларида ҳам ҳамшира фаол. У хотин-қизларнинг ҳуқуқий, сиёсий билим ва маданиятини оширишда турли кўринишдаги 100 дан тарғибот-ташвиқот тадбирларини ташкил этиб келмоқда. Уларда хотин-қизларнинг жамиятдаги ўрни ва маъқени юксалтириш, таъйиқ ва зўравонликнинг турли шакли ва кўринишларидан ҳимоялашга қаратилган зарур бўлган билим ва тавсиялар бериб борилади.

Бир сўз билан айтганда, Муқаддам Норбоеванинг партиявий фаолиятида амалга оширган ибратли ишларнинг адоғи йўқ. У чинакам инсоний хислатлари билан барчага ўрнак бўла оладиган жонкуяр, фидоий, азму шижоатли ўзбек аёллидир.

Зухро МИРЗОҲАМДАМОВА,
О'zLiDeP Тошкент вилоят
кенгаши бўлим мудир

КИМЛАРНИНГ ПЕНСИЯСИ ОШДИ? БОШҚАЛАРНИКИ НЕГА ОШМАДИ?

...Йил бошласидан энг кўп муҳокама қилинган мавзу нима ҳақда бўлди? Аномал (аслида кескин қорасовуқ дейишарди бундай табиаат ҳодисасини кексалар) ҳаво ўзгариши, табиий газ ва электр таъминотидаги узлишларми? Йўқ, булар сал кейинги мавзу. Қишлоқ жойларда энг кўп тилга олингани, муҳокама қилингани 1 январдан пенсиялар оширилиши бўлди. Тўйи маъракаларда асосан шу мавзу атрофидаги гаплар, тортишувлар...

Икки киши учрашиб қолганида ҳам асосан шу гап – бир-бирига саломдан олдин савол беришади: “Пенсиялар оширилибдими, сенкига неча сўм кўшилибди?”

Жавоб ҳам тайин: “Ошармиш, деб эшитувдим, лекин меники ошмади – шу эски йилдагидек!”

“Бой бойга боқар, сув сойга оқар”, деган гап беҳуда тўқилмаган, биродар. Кўп пенсия оладиганларга кўшибдилар. Бизга ўхшаган кам пенсия оладиганлар бу рўйхатга кирмайдилар, шекилли...”

“Э, Худо баракатини берсин!”

Аслида юқори маош олиб ишлаган, аммо фуқаролик пенсияси учун белгиланган қатъий меъёр (буни ўзимизча “шип” дейишарди) туяйли нисбатан кам пенсия олаётганларнинг нафақасига кўшимча қўшилгани, яъни энг юқори пенсия базавий ҳисоблашнинг 12 баравари даражасига кўтарилгани, бу адолатли қарор эканлигига қишлоқ одамларини ишонтириш қийин. Сабаби...

Мисолни эштинг: бирга ўйнаб ўсган, ўн йил ёнма-ён ўқиган йилгит 45 йиллик иш стаж билан қариллик нафақасига чиқди. Ҳали мактабнинг қўли синфида ўқиган вақтиданоқ колхозда ишлаган, кейин тракторчилик курсини тугатиб, бирор қирқ йил қора мойга ботиб, рўзгорини боққан (орада икки йил ҳарбий хизмат ҳам бор) инсон энг паст – минимал миқдордаги пенсия оляпти. Нимага?



Колхоз деганнинг бир замонлар оддий деҳқон, сувчию тракторчига берган ойлик маоши маълум. Ундаям экиш, парваришлар, йиғим-терим мавсумида олган ўша пулни. Қиш ойларида эса буям йўқ эди.

Ва яна ойлик маошидан 20 фоиз чегириб қолиб, йил якунида “йиллик маош” сифатида берилган. Ундаям колхоз режаларни бажарган, етарли даромад олган бўлсагина. Режа аро йўлда қолган бўлса... ўша “йиллик маош” деганини қўлогини ушлаб кетган. Анча йиллар олдин колхоздан

нафақага чиққан айрим фуқароларнинг пенсиялари қайта ҳисоблангани ва айнан ўша “йиллик маош”ни муқофот деб талқин қилиб, (ҳатто бир ой пилла қурти боқиб, бирор минг сўм иш ҳақи олган аёлларга ҳам ҳалол меҳнати ҳақини “муқофот” дейишга чоришди) ортиқча пенсияларини қайтариб давлатга тўлашганини яхши эслаймиз. Яхшиямки, Мирзиёев даврига келибгина бундай шармандалар чекловларга нуқта қўйилди ва “қарздор” бечоралар яна пенсияларини тўлиқ ола бошлашди.

Арзиманган, энг паст пенсияларини! Таассуфки, бирор дўконми, идорарада қоровул бўлиб ишлаганлар ҳам айрим колхозчилардан кўпроқ пенсия олишарди. Қоровуллик – икки кунда бир кун ишлаш дегани.

Бутун халқни озиқ-овқат билан таъминлаган, устини бутлаган, йил – ўн икки ой даласидан чиқмаган сувчи, ишчи-деҳқоннинг пенсияси ҳатто умуман ишлаган, иш стаж билмаганларга бериладиган қариллик нафақаси билан деярли тенг эканига нима дейиш мумкин?

...Йил бошласидан кенг муҳокама бўлган мавзу – пенсиянинг оширилишидан (аслида кўтарилиши) энг кўп норози бўлганлар ҳам айнан бутун умри совхозу колхоз деб суяги оқарган бандлар бўлганди.

Ўз даврида завод ёки фабрикада кунига саккиз соатдан ишлаганлар (яна дам олиш кунларини айтинг!) бутун камда икки миллион, иш соатлари меъёрлари белгиланмаган, дам олиш тушига ҳам кирмаган колхозчилар эса... олти юз минг сўмдан сал кўпроқ пенсия олишарди. Хўжаликлар фаолият юритган даврда бутун умри далада кечган айрим фахрийларга колхоз ажралмас фонди ҳисобидан кўшимча пенсия бериш тартиби амалиётда эди. Ана шу калхўзлар тарих мулкига айланиши билан бу амалиёт ҳам йўққа чиқди.

Аслида бу адолатданми айтинг! “Ҳамма олим бўлса, қўйни ким боқади” деган ҳақ матални шу ўринда “Ҳамма завод-фабрикада ишласа... ерга ким қарайди, қозонимизга тушади озиқ-овқатни ким етиштиради?” деб ўзгартриш мумкин.

...Баҳс-мунозара кетаётган даврда кекса шифокор айтмиш гап ҳаммага маъқул тушди – ҳамма бош ирғаб маъқуллашди:

“Қон босими кўтарилишини халқона тилда “хафакон” деймиз. Аслида, бу пенсия оширилиши шунга ўхшайди – қон босими доимо кўтарилиб туради. Пенсия ҳам шу хасталикка ўхшайпти. Хафаконни борлар – катта пенсия оладиганларнинг яна кетмони учди”.

Бу шунчаки ўхшатиш – ҳазил. Аммо... Мен, бир умр қишлоқ одамлари орасида юрган оддий мухбир-журна-

лист сифатида хурматли Олий Мажлис депутатлари ва сенаторларидан илтимосим: бугун мамлакат аҳолисининг асосий қисми қишлоқларда яшаётганлигини инобатга олиб, бу масалани нуфузли минбарларда жиддийроқ тартибда кўриб чиқиш вақти келди.

Эштинг, фикримни асослайман: масалан, бундан нари борса ўттиз йил бурун қишлоқ худудларида каттароқ ойлик маш тўланадиган иш жойлари бормиди? Албатта, йўқ эди. Наридан бора с мактаб ўқитувчиларига ҳамин қадар ойлик олган бўлиши мумкин. ҚВПларни гапирмай қўя қолай. Ҳатто ҳозир ҳам олий маълумотли врач-шифокорлар икки-уч миллион атрофида моюна олиши эҳтимолдан холи эмас. Ана энди ана шу ишчи-хизматчиларнинг пенсиясини тасаввур қилаверинг.

Энг ачинарлиси, бутун умри давомида далада механизаторлик ё сувчи бўлиб ишлаган билан бели огринмасдан, қоровул ё оддий енгил-елия юмушларни бажарганининг пенсия уртасида катта тафовут йўқ-ку? Нега бу каби номувофиқликлар юқоридаги каби пенсиялар белгилаш ва улар миқдорини оширишда инобатга олинмаган? Бундай тенгсизлик, айтиш мумкинки, адолатсизлик қачон ўз ечимини топади?

Бу каби эътирозларни кенг жамоатчилик муҳокамасига олиб чиқсак ва ҳуқуқат, ваколатли идоралар бу борада адолатли қарорлар қабул қилса, савоб иш бўлармиди...

Рўзимбой ҲАСАН,
“XXI asr” мухбири

ЎҚУВЛАР

МУРОЖААТНОМА ТАРҒИБОТИ КЕНГАЙМОҚДА

Маълумки, O'zLiDeP Сийсий Кенгаши Ижроия кўмитаси ҳамда Олий Мажлис Қонунчилик палатасидаги фракциясининг қўшма қарорига асосан Президент Шавкат Мирзиёевнинг 2022 йил 20 декабрдаги Олий Мажлис ва Ўзбекистон халқига Мурожаатномасининг олти устувор йўналишларидаги вазифаларни амалга ошириш ҳамда Мурожаатнома тарғиботи бўйича алоҳида ишчи гуруҳлар тузилиб, уларнинг ҳар бири учун ўз йўналишида амалга оширилиши лозим бўлган вазифалар белгиланган эди.



Шундан келиб чиққан ҳолда O'zLiDeP ҳузуридаги Сийсий таълим маркази ва Олий Мажлис Қонунчилик палатасидаги фракциясининг ҳамкорлигида тарғиботи, депутат ёрдамчилари, БПТ раислари учун мазкур ҳужжат мазмун-моҳиятини чуқур ўрганишга бағишланган туркум давра суҳбатлари ва ўқув семинарлар ташкил этилмоқда.

Тадбирда Мурожаатномада белгиланган устувор йўналишлар ҳақида тўхталиб ўтилди. Жумладан, “Илҳам ва самарали давлат бошқарув тизимига ўтиш”, “Янги Ўзбекистонни “ижтимоий давлат” тамойили асосида қуриш”, “Инсон ҳуқуқ ва эркинликларини ишончли ҳимоя қилиш давлатнинг конституциявий мажбурияти”, “Экология, қишлоқ ва сув хўжалиги масалалари”, “Эркин бозор механизмларини жорий қилиш, соғлом рақобат ва хусусий мулк дахлсизлигини таъминлаш, тадбиркорликни қўллаб-қувватлаш”, “Иқтисодий таъминот ва ҳорижий хусусий инвестицияларни кўпайтириш учун шароитларни яна-

да яхшилаш”, “Очиқ ва прагматик, ўзаро ишонч ва ҳурматга асосланган ташқи сиёсатни изчил давом эттириш, Миллий ҳавфсизликни таъминлаш, Қуролли Кучларимиз жанговар салоҳиятини ошириш” йўналишлари бўйича белгиланган устувор вазифалар, уларнинг ижросини таъминлаш механизмлари ва ҳуқуқий асослари узасидан тарғиботи фракцияси аъзолари, ишчи гуруҳ раҳбарлари атрофида маълумот ва тушунтиришлар беришди.

Партиянинг матбуот марказида онлайн видеоконференция шаклида ташкил қилинган навбатдаги ўқув семинарида барча ҳудудий кенгашлар вакиллари, депутат ва уларнинг ёрдамчилари, БПТ раислари ва фаоллар иштирок этди. Мамлакат ҳаётида ўзига хос дастуриламал вазифасини ўташи мумкин бўлмиш ушбу ҳужжатда белгилаб берилган долзарб вазифалар ижросига бағишланган тарғибот тадбирлари, давра суҳбатлари ва ўқув семинарлар хусусида фикр ва мулоҳазалар, хулоса ва тақлифлар билдирилди.

ЗАМОНДОШЛАРИМИЗ

БУХОРОДА ШУНДАЙ АЁЛ БОР...



2021 йилнинг ноябри. “Тошкент – Бухоро” йўналишида Президент совғаси – “Спарк” энгил автомобиласини бухоролик тадбиркор, O'zLiDeP фаоли Мамлакат Содиқова бошқариб борарди. Тийрак кўзлари йўлда, қўллари рўлда бўлса-да, ҳаёлида олмас ва яқин йиллар кечмиши кинотасмадек ўтарди.

Мустанқиллигимизнинг дастлабки йиллари кичик бизнес ва хусусий тадбиркорликни танлаган юртдошларимиз учун осон кечгани йўқ. Мамлакат Содиқова ҳам буни очик-ойдин изоҳлаб, 2004 йилда ўз орзуларига эришишга жиддий қиришгани, бу борада турмуш ўртоғи унга қанот бўлганини эслайди. Гап шундаки, ундан бир йил олдин, 2003 йилда Тадбиркорлар ва ишбилармонлар ҳаракати – O'zLiDeP сийсий майдонда ўз фаолиятини бошлаган, барча бошловчи мулкдорлар қатори опа ҳам мазкур сийсий тузилманинг дастурий мақсад ва вазифаларини амалга оширишга ўз ҳиссасини қўша бошлаган эди. Унинг иқтисодий-бухгалтерлик илми ва тажрибаси жуда кўл келган эди ўшанда.

Ишбилармон ва тадбиркор аёл ўз фаолиятини қишлоқ хўжалиги маҳсулотларини қуритиш ва сақлашга йўналтирди. Дастлаб давлат биносини ижарага олиб, атиги икки нафар ходим билан иш бошлади. Маълум бир муддат ўтгач, мурожаатига биноан вилоят ҳокимлиги ажратиб берган ер майдонда бўлажак қорхона биноси қад кўтарди. “Замин Мадад тайёрлов савдо” МЧЖга асос солинди.

Қорхона фаолияти билан бирваракайига O'zLiDePнинг ғоя ва мақсадларини амалга ошириш ва тарғиб қилишда камарбаста бўлди. Ўз навбатида, сийсий кучнинг бир қатор кўрик-танловларида муваффақиятли иштирок этиб, ғолиб бўлди.

Вилоятдаги пешқадим ишлаб чиқариш субъектларидан бўлмиш “Замин Мадад тайёрлов савдо”нинг фаолият тури эндиликда кундан кунга кенгайиб бормоқда. Нафақат ички бозор, балки

МДХ давлатларига ҳам қурилган мева ва сабзавотларни пешма-пеш етказиб берапти. Қорхонада бугун 60 дан зиёд хотин-қизнинг бандлиги таъминланган.

Тадбиркор хориждаги ҳамкорлари билан дўстона алоқаларни йўлга қўйгани иш ривожига муҳим ўрин тутди. Бир мисол, 2021 йилнинг сентябрь ойида Бишкек шаҳрида ўтказилган Ўзбекистон ва Қирғизистон Республикалари тадбиркор аёллари мулоқот-форуми давомида ҳикоямиз қаҳрамони бир қатор давлатларнинг бизнес соҳаси вакиллари билан жами 3,5 млн. АҚШ доллар миқдоридан ўзаро манфаатли шартномаларни имзолашга муваффақ бўлди.

Жамоатчиликдаги фаолиги, хусусан, O'zLiDeP Бухоро шаҳар кенгаши раисининг хотин-қизлар масалалари бўйича ўринбосари сифатидаги ишлари ҳам эътибор ва эътирофда. Сенатнинг Хотин-қизлар ва гендер тенглиги масалалари кўмитаси ҳузуридаги тадбиркор аёллар клуби раҳбари этиб тайинлангани ҳам бежиз эмас.

Таъкидлаш жоизки, эътибор, эътироф ва рағбатда ҳикमत кўп. Узининг тинимсиз изланиш меҳнатлари ва уларга ҳуқуқат томонидан берилган эътибор натижаси ўлароқ, Мамлакат Содиқова 2018 йили “Йил аёли” республика миллий танловининг “Саноатда саодат толган йил аёли”, “Ўзбекистон аёлларининг 100 та энг яхши инновация лойиҳаси” танловида эса “Кичик бизнесдаги энг яхши лойиҳа” муаллифи, “Анор” ва “Ишбилармон аёл”, 2021 йили “Энг намунали иш берувчи аёл” кўрик-танлови ғолибаси бўлди. Шижоатли аёл хануз изланишда, тиниб-тинчгани йўқ. Яқинда Бухоро шаҳрида унинг ташаббуси билан яна бир ижтимоий ҳимоя ва экологик марказ – “Шижоатли аёл” ўз фаолиятини бошлади. Бу ерда таҳсил олувчи хотин-қизлар келгусида ҳаётга янада ёрқин нигоҳ билан қарши, оқанинг изидан бориб, фаолларнинг фаоли қаторидан ўрин эгаллашлари шубҳасиз.

Асхор ИСТАМОВ,
“XXI asr” мухбири

ЭЪЛОН

ТОШКЕНТ ШАҲРИ “М.Х. MAQSAD” ХАЙРИЯ ЖАМОАТ ФОНДИНИНГ МОЛИВИЙ ҲИСОБОТИ

2022 йил 1 январь ҳолатига фондинг асосий ҳисоб рақамида 3 976 665 (уч миллион тўққиз юз етмиш олти минг олти юз олти беш) сўм 98 тийин пул маблағи бўлган.

2022 йил давомида:

– UZPAYNET, Clik, PAYME, банкотат аппаратларидан пластик карта орқали фонд асосий ҳисоб рақамига 42 106 644 (қирқ икки миллион бир юз олти минг олти юз қирқ тўрт) сўм 37 тийин хайрия пуллари тушган;
ABDUKARIMOVA KAMOLA MUXRITDINOVA томонидан 21 000 000 (йигирма бир миллион) сўм устав фонди шакллантирилган.

Шундан: 2022 йил учун ойлик иш ҳақи фондига 10 086 153 (ўн миллион саксон олти минг бир юз эллик уч) сўм 84 тийин; ойлик иш ҳақидан ушлаб қолинган солиқлар учун 2 750 861 (икки миллион етти юз эллик минг саккиз юз олти беш) сўм 54 тийин; Тошкент шаҳридаги “Ракат” жоме масжиди қурилиши учун 29 000 000 (йигирма тўққиз миллион) сўм; Тошкент шаҳридаги “Иброҳим” жоме масжиди қурилиши учун 14 000 000 (ўн тўрт миллион) сўм молиявий ёрдам (хайрия) маблағи; аудит хизмати учун 500 000 (беш юз минг) сўм; бинодан фойдаланганлик учун ижара тўлови (2021 й.) - 60 000 (олтмиш минг) сўм; банк харажатлари учун - 871 549 (саккиз юз етмиш бир минг беш юз қирқ тўққиз) сўм 79 тийин; иш берувчининг фуқаролик жавобгарлигини мажбурий суғурта қилиш учун 5 995 (беш минг тўққиз юз тўқсон беш) сўм 50 тийин; газетада ҳисобот ёритилиши учун 172 500 (бир юз етмиш икки минг беш юз) сўм;

Жами 57 447 060 (эллик етти миллион тўрт юз қирқ етти минг олти беш) сўм 67 тийин маблағ харажат қилинган.

2023 йил 1 январь ҳолатига фондинг асосий ҳисоб рақамида 9 636 249 (тўққиз миллион олти юз ўттиз олти минг икки юз қирқ тўққиз) сўм 68 тийин пул маблағи мавжуд.

ҲАҚИҚАТ СИНМАЙДИ

АВВАЛ ҚАМАЛДИ, КЕЙИН ОҚЛАНДИ ВА БУГУН...

Нихоят 21 йилдан сўнг хизмати тақдирланган инсон тақдири хусусида



2018 йилнинг баҳори. Наврўз арафаси эди. Таҳририятимизга сочлари барвақт қордек оқарган, кулиб турса-да, қалбидаги задалликлар юзига хира ранг бериб турган, эллик ёшнинг нари-берисидидаги бир киши кириб келди. Қўлидаги катта сумкага бир талай ҳужжатлар солинган.

– Бир мурожаат билан келувдим. Маъқул келса, ёрдам берсангизлар...

Одатда аксарият шикоятчилар дағдағасимон бўйруқ билан мурожаат этишади. Масаласини далиллайдиган ҳужжатларни сўрасак, уларни тақдим этиш ўрнига шартта “атай сўраганликда” айблашиб, ҳатто бақиршиб, йиғлашганча боришади. Уларнинг истагида жабр бераётганларни оғизларидан шитиб, ёсага-у, чоп этсак. Иккинчи томоннинг шаъни, кадр-қиммати, бадном бўлиши ва ишни ўрганмасдан ҳаттога йўл қўйганимиз учун эртага қонун олдида жавоб беришимизнинг заррача аҳамияти йўқ. Ишлари битси, аламларини шу йўсинда олсалар, бўлди.

Аммо бу одам улاردан фарқли йўсинда, юксак маданият ва қонун талабларга амал қилган ҳолда мулоқотга киришди.

– Синглим, 10 йил аввал тўхмат билан 12 йил муддатга озодликдан маҳрум қилинган эдим. Яқинда суд қарори билан қонуний оқландим! Менга нисбатан ўша вақтдаги куч ишлар тизими (ИХХ)нинг бюротмаси билан қўйилган барча айбловларнинг асосизлиги, тўхмат экани исботланди! Бу йилги баҳор, Наврўз чинакамга мен ва менга ўхшаган – аёвсиз қораланиб, сўнг оқланганларникидир. Илтимосим, менинг бошимдан ўтган воқеалар ҳақида мақола тайёрлаб, чоп этсангизлар. Бир неча нуфузли газеталарга ҳам бордини. Рўйхушлик беришмади...

Шундай дея, энди сўрамоқчи бўлганим далилий асослар: айблов ва оқлов ҳужжатлари ҳамда яна бошқа зарур, ҳатто шахсини тасдиқловчи ҳужжатларгача узатди.

Жиноят процессуал кодексининг 309-моддасига қўра, шахс ўшабу турилганлиги, қамалганлиги, лавозимидан четлаштирилганлиги, тиббий муассасга жойлаштирилганлиги ёки ҳукм қилинганлиги тўғрисидаги маълумотлар матбуотда эълон қилинган, радио, телевидение ёки бошқа оммавий ахборот воситалари

орқали тарқатилган бўлса, реабилитация этилган шахснинг, у вафот этган бўлса, қариндошларининг, суд, прокурор, терговчининг ва суриштирувчининг талабига қўра тегишли оммавий ахборот воситалари унинг реабилитация этилганлиги тўғрисида бир ой ичида хабар беришлари шарт. Ҳужжатлардан маълум бўлдики, мурожаатчи – Нурулла Қаюмов 2004 йилдан Қашқадарё вилояти Чироқчи туманига ҳоким этиб тайинланган. Унгача Ички ишлар вазири ва унинг ҳудудий бошқармаларида юқори лавозимларда ишлаб, Ватанимиз хавфсизлигига таҳдид солмоқчи бўлган ва солиб турган оғир жиноят ва жиноятчиларга қарши аёвсиз курашган. Бу иллатларга барҳам беришда фаол иштирок этгани учун 2004 йилда “Жасорат” медали билан тақдирланган, подполковник ҳарбий унвонига эга. Туман ҳокими сифатида эътироф этишга арзирли меҳнатлари учун 2006 йили “Ўзбекистон Республикаси мустақиллигига 15 йил” кўкрак нишони билан мукофотланган.

У ўзи бош бўлган туман халқига қанчалик меҳрибон бўлса, адолатсизликка шунчалик шафқатсиз эди. Ҳуқуқшунос бўлгани, ички ишлар тизимида узоқ йиллар жиноятчиликка қарши курашгани боис қон-қонига сингиб кетган фазилат – ҳақсизликка қарши курашишдан асло чекинмади. Ўз ишига номуносибларни курсисидан туширарди-қўярди. Уларнинг ўрнига тажрибали, ҳалол кадрларни лавозимга тайинларди. Мана, унинг асосий “айб”и.

Айниқса, тадбиркорларнинг ҳуқуқларини поймол этиб, дўконларни ишбилармонлар, оддий халқ қилиб, танишларига пуллаётган туман марказий дехқон бозори масўлларидадан бирининг хурмача қилиқларидан хабардор бўлганда чидаб туролмади. Халқнинг кўп қисми шу ерда ишлаб қора қозонини қайнатади, ишбилармонларга эркинлик яратши ва қўллаб-қувватлаш давлат сиёсати даражасига кўтарилиб турган бир пайтда бундай кўзбўямачиликни кўриб кўрмасликка олишга ҳокимнинг виждонини йўл бермади. Қонунбузарнинг бошқа қилғиликларидан ҳам хабар топган, унинг қавушини тўғрилаб қўйди...

Шу пайтгача мушугини биров “пиш” демаган, узоқ йиллардан бери бозорда маҳкам ўрнашиб олган кимса мансабига қайтиш учун “бакуват” идораларда ишлайдиган “танка”ларини ўртага солиди, устма-уст кўнғироқ қилдириди, сўнг илтимосга ўтиди, ҳатто “ғўдайган”лар бўйруқ беришдики, бир сузли раҳбар қаро-

рини ўзгартирмади. Бу ҳам етмагандай, ундан ўша масўлнинг ўғлини туманда янги очилган нефть базасига омбор мудирлигига тайинлашни ҳам қўшиб талаб этишди. Бу топшириқни ҳам у қабул қилмади...

Ҳаммаси ана шундан кейин бошланди. Тегишли идоралар билан “келишиб” ишламаган туман ҳокимининг попугини пасайтириб қўйиш учун бор “билим ва тажриба” ишга солинди. Президентимиз таъбири билан айтганда, “столбани қамашга асос топган” идора вакиллари сохта жабрланувчи “ясаши” (газийк остида): “Мендан ҳоким бува савдо дўкони қуришмига ер ажратиши учун 3,5 миллион сўм сўм пора олган”, деди бири (яна бошқа қўллаб сохта далиллар йиғилди). Энг қизиғи, аслида адолат ҳиди таралиб туриши керак бўлган судья дастлабки тергов органи тақдим этган далилларнинг сохталлигига, ақалли “пора бергич” шикоятчининг руҳий касаллигига эътибор қаратмади. Жами 18 томлик (!) айбловлар ана шундай “ясалди”.

– Тўхмат балосининг нечоғлиқ даҳшатли азоб эканлигини 2007 йил 5 сентябрда Миллий хавфсизлик хизмати вилоят бошқармаси тергов бўлими бошлиғи томонидан қамоққа олинганимда, уч ой тергов ҳибсхонасида сақланганимда, биринчи инстанция ва апелляция инстанция суд мажлислари олти ой давом этганида, онамдан ажралиб маъракаларида туролганимда, ноҳақ қамалганимда суянган акаларимдан бири руҳий тушқунлик исканжасида инфарктга чалинганда, яна бири вафот этганида билдим, – деди Нурулла Қаюмов қўли билан чап кўксини ушлаб. – Суд ҳукми ўқилганидан сўнг аёлим ва фарзандимнинг оғир автохалокатга учрагани, ноқонуний суд ҳукмидан тайёрланган ноҳолис мақолалар хорижий сайтларда босилиб, менинг номимни обрўсизлаштиришига билдим тўхмат тоши нақадар оғирлигини...

Хато қилсанг-у, жазолансанг, айбимга яраша-да, деб узингга таскин берасан, аммо айбисиз айбдор бўлиш ҳаммасидан ёмон экан. Ишонасизми-йўқми, мени терговчилар умуман сўроқ қилишмаган, гувоҳлар билан юзлаштиришмаган, ҳужжатларни кўрсатишмаган. Нега? Чунки уларнинг қалбақчилигини ва менинг измом йўқлигини билиб қўлишимдан қўрқибсан. Мен ҳақиқатда тўқиб-бичилган барча эпизод бўйича айбловлардан фақат судда хабар топганман.

Бу айбларнинг нотўғрилиги, асоссизлигини исботлашга менда етарлича маълумот

ва билим бор эди. Аммо мени эшитишмади. Афсуски, адолат қўрғони бўлиши лозим бўлган судья ўз ҳамтовоқлари – терговчи ва прокурорлар тақдим этган маълумотларни ҳар томонлама текшириши, суд терговчи ўтказиши ўрнига асосли далилларимдан бирортасиням инобатга олмастан, бир чақалоқ мучал ёшига етганидан мўддатга халқим, фарзандларимдан узоқда, панжара ортида умр ўтказишга мажбур қилди. Апелляция инстанция босқичи ҳам мени эмас, дастлабки босқич судини ҳимоя қилди...

Ана шундай пайтларда, муҳтарам Президентимиз Шавкат Мирзиёев мен ва менга ўхшаган ҳуқуқлар поймол этилган фуқароларни ҳимоя қилиш истагида 2016 йилнинг 21 октябрида “Суд-ҳуқуқ тизимини янада ислоҳ қилиш, фуқароларнинг ҳуқуқ ва эркинликларини ишончли ҳимоя қилиш чора-тадбирлари тўғрисида”ги фармонини имзолади. Ушандаги қувончимни тасаввур этолмайсиз. Бу ҳужжат бир кун келиб менинг айбсизлигим исботланиши ва оқланишимга ишора бериб, қалбимда йиллар давомида топталган тақдиримни тиклашга умид йўғотди. Ҳақиқатан ҳам, **Жиноят ишлари бўйича Қашқадарё вилоят суди апелляция судлов хайъатининг 2017 йил 23 ноябрдаги ажрими билан мен барча айб эпизодлари бўйича айбсиз деб топилдим ва реабилитация қилиш йўли билан оқландим!** Оқланмоқ мен учун покланмоқ демак, фарз ва чирок мақсадларда елкамга қўйилган тўхмат тошларидан халос бўлиш, қонун тили билан айтганда, айбсизликнинг суд қарори билан исботланиши дегани! Буларнинг бари халқпарвар давлатимиз раҳбарининг одил сиёсати, мард ва жасорат билан халқи учун ёниб яшаётгани туғайлидир.

Хуллас, у айбдорликда гумон қилиниб, маҳкамага олиб кетилганидан шу пайтгача бошидан кечирган азобу изтиробларини тингладим. 3 000 вақадан ортиқ суд ва тергов материаллари билан танишдим, у ишдан ҳудудга бориб аҳоли билан суҳбатлашдим, фикрларини олдим. Хуллас, ёзмасликнинг иложи йўқ. Уйқусиз уч суткада мақола – оқлов тайёр бўлди. “**Ун йилга қўзилган оқлов ёхуд Нурулла Қаюмов бошидан кечган ажаб савдолар хусусида**” сарлавҳали мазкур мақола газетамизнинг 2018 йил 5 апрелдаги сонида дунё юзини кўрган эди.

Орадан бирор ойча ўтиб, таҳририятимизга ҳарбий либосдаги бир инсон кўшадий ча-

рақлаб, эски танишлардек кириб келди. Чехраси танишдек туюлса-да, ростки, эслаёлмадим. У эса танимаганимизга ишонмас, аксинча, миннатдорлигининг чеки йўқ эди:

– Ишонасизми, мақола чиққанидан бери табриқлаш учун туну кун кўнғироқлар бўлди, кўргани келишди. Матбуотнинг сўзи барибир бошқача бўлар экан. Ишонасизми, оқланган куним нари борса юз нафарча таниш-билишлар хабардор бўлганда айбсизлигимдан. Энди қарангки, бутун Ўзбекистон аҳли, ҳатто хориждаги кадрдонлар ҳам қўллашпоти мақоланинг сайтларда тарқалган вариантини ўқиб. Бу эса менинг йиллаб ютган дардларимни ариятпти, барак топинглар. Айниқса, оқланганимдан хабар толга Ички ишлар вазири Пулат Бобоқонов мени чақириб, вазириликка, маъсул лавозимга ўзга тиклади. Бундай эътибордан хурсанд бўлмай бўладими?!

Суюнганимиз, илк келганида ноҳақликлар, менинг айбим нима, деган тизгинсиз саволлар йиллар давомида ич-этини кемирган ва у оғриқлардан ранги сарғайган, зўрға кулиб турган ўша оқланган инсоннинг кўзлари бугун ўзгача порлар, хотиржам ва хурсанд, ҳатто аввалгидан анча ёшарган эди. Бунга оз бўлса-да, ҳисса қўшганимиздан биз ҳам ўзимизда йўқ қувондик.

Яқинда, 14 январь – Ватан ҳимоячилари кўни муносабати билан қаҳрамонимиз, ҳозирги пайтда ИИБ Ташкилий департамент ахборот-таҳлил бошқармаси бошлиғи ўринбосари – жазони ижро этиш тизими фаолиятини мувофиқлаштириш ва назорат қилиш бўлими бошлиғи, подполковник Нурулла Қаюмов фаолияти давомидаги жонқуялиги ва вазифасини виждонан, сидқидилдан бажаргани учун алоҳида тақдирланганини эшитиб янада фахрландик. Ички ишлар вазири унга полковник ҳарбий унвонини топширди!

– Бунгача охириги ҳарбий унвоним – полковник даражасига 2002 йилда миясар бўлган эдим. Бунчи қарангки, кадрдон идораларда қайта ишлаш ва 21 йил ўтиб навбатдаги юксак унвон соҳиби бўлиш насиб этди. Бундай ишонч ва эътибор учун ҳар қанча раҳмат десам, меҳнат қилсам кам. Юртимиз тинчлиги ва оқиллигини таъминлаш учун туну кун содиқ хизматим билан бу ишончли оқлашга тайёрман!

Нурун ЭЛМИРЗАЕВА, “XXI asr” мухбири

ФАСЛ ЖУМБОҒИ

ҚАҲРАТОННИНГ ИҚТИСОДИЁТГА ЗАРАРИ ЎЛЧАНАДИМИ?

Дунёнинг қайси давлатида қутилган ёки қутилмаган қийинчилик кузатилмайдими?

Қандайдир сабаб(табiiий офат, пандемия, қутилмаган ҳолат ва ҳ.к.)лар билан иқтисодиёти, ҳукумати синовдан ўтмаган давлат бу дунёда бормикан ўзи?

Хўш, жуда кўп бора такрорланаётган аномал совуқ Ўзбекистонда халқимизни ҳар томонлама ташвишга солгани қайси мезон билан ўлчасак бўлади? Бор ҳақиқатни ҳам айтиш керакки, бу қутилмаган ҳолат қатор тизимлардаги барча камчиликларни бор бўйи билан кўрсатиб қўйди. Бундан фақат хавотирга тушиш мумкин, холос. Нега? Чунки биздаги мавжуд тизимлар бу каби оғир табиат қийинчиликларига ҳали тайёр эмас экан. Бу биринчи навбатда энергетика, газ, коммунал ва бошқа хўжалик хизматларига тегишли эканини унутмайлик.

Шу ўринда ҳақли бир савол туғилади: бизда ҳам бошқа мамлакатлардагидек аномал совуқ оқибатида кўрилган зарар ҳисоб-китоб қилинадида?

Дейлик, бугун ҳукумат оддий одамларимизнинг хонадонларида музлаб ёрилган иссиқ ва совуқ сув трубалари, қувурлар, батареялар, “иссиқ пол”лар, умуман, яқин орада уй-жойларнинг таъмирланишига сабаб бўлган ҳолатлар қай даражада таҳлил қилинапти? Инсоний талафотлар,

хасталикларга чалиниш, экологик офатлар(қанча мевали ва манзарали даракларнинг нобуд бўлгани), боғдорчилик, зароатчиликка етказилган зарарлар, ҳайвонот дунёсидаги йўқотишлар ҳисоб-китоб этилиши керак-ку! Яна бир даҳшатли кургиллик – электр ёхуд газ тақчиллиги оқибатида юзага келган қисқа ёки “узун” туташувлар оқибатида юзага келган ёнғинлар ва қурбон бўлган инсонлар тақдири-чи? Уларни пул ё маблаг билан ўлчаб бўлармикан?

Ёки бўлмаса, музлаб ётган, уз вақтида куралмаган, тозаланмаган йўллардаги йўл-транспорт ҳодисаларида ҳалок бўлган ё жароҳат олган одамлар, уларнинг шикастланган шахсий транспорт воситалари қанчага тушаётгани ўрганиладими?

Бу билан давлат ҳар бир юзага келган табиийи, нотабиийи, ҳолатларга жавобгар ва албатта товонини тўлаши керак, демоқчимасан. Халқона айтганда, бошга тушганини кўз кўраверади. Аввало, қутилмаган бундай синовлардан омон-эсон ўтиш барчамизга насиб этмоғини тилаймиз. Лекин ҳа, энди, бу ҳам бир табиий кулфат-да деб бор айбни аномал совуқнинг гарданига юклаб қўяверсак, оқибати нима бўлади? Ақсар ҳолларда бепарволикка йўл қўйган ёки юқори минбарларда айтилганидек, ёлғон ҳисоботлар бериб ҳаммани алдаган маъсул раҳбарларнинг жавобгарлиги масаласи нима бўлади? Бундай пайтда турли баҳоналар ўтмайди.



Айтмоқчиманки, бундай вазиятда, аввало, давлат бюджетини ҳамда халқимизнинг “чўнтағи”га тушадиган сарф-харажатларни ўрганадиган ва ҳолис, тўғри маълумотларни шакллантирадиган мустақил институт бизда ҳам бўлиши керак эмасми?

Зора, мисол учун, мана шу ўтаётган беш-ун кун ичида қўрилган (кам эмас-да ахир) мислсиз зарар миқ-

дори очиқ-ойдин маълум қилинса, бу эртанги кунда барча бўғиндаги раҳбарларни, қолаверса, жамоатчиликни ҳам сергак тортирган бўлар эди...

Саодат СОДИҚОВА, журналист

O‘zLiDeP Тошкент вилоят кенгаши жамоаси узоқ йиллар партия тизимида самарали меҳнат қилган фахрий Зоиат Абдуазимовга онаси Мамлакат аянинг вафоти муносабати билан ҳамдардлик билдиради.

MUASSIS: TADBIRKORLAR VA ISHBILARMONLAR HARAKATI – O‘ZBEKISTON LIBERAL-DEMOKRATIK PARTIYASI



Бош муҳаррир Норқобил ЖАЛИЛОВ

Таҳрир хайъати: Ақтам ХАЙТОВ, Дилшод ШОУМАРОВ, Шуҳрат БАҒОЕВ, Мавлуда ХУҲАЕВА

Сирожиiddин САЙИИД, Адҳам ШОДМОНОВ, Виктор ПАК, Насимжон АЛИМОВ

Сардор МУСТАҒОЕВ (Бош муҳаррир ўринбосари)

Таҳририят манзили: Тошкент шаҳри Нукус кўчаси 73А-уй.

Электрон почта: xxi_asr@mail.ru, xxi_asr@mail.ru

Телефонлар: қабулхона – 71 215-63-80 (тел./факс).

Обуна ва реклама бўлими – 71 255-68-50.

“XXI asr” ижтимоий-сиёсий газетаси Ўзбекистон Матбуот ва ахборот агентлигида 2011 йил 14 июнда 0009-рақами билан рўйхатдан ўтказилган.

“Шарқ” нашриёт-матбаа акциядорлик компанияси босмахонасида чоп этилди.

Корхона манзили: Тошкент шаҳри Буюк Турон кўчаси 41-уй. Газета офсет усулида, А-2 форматда босилди. Ҳажми – 3 босма табақ. Буюртма рақами: Г – 145. Адади: 5251. Баҳоси келишилган нархда. Топширилди – 20:30.

Таҳририятга келган қўлэмалар тақриз қилинмайди ва муаллифларга қайтарилмайди.

© “XXI asr” дан олинган маълумотларга манба сифатида газета номи кўрсатилиши шарт.

Муаллифлар фикри таҳририят нуқтаи назаридан фарқ қилиши мумкин. Газета таҳририят компьютер марказида терилди ҳамда дизайнер

Маъруфжон Раҳмон саҳифалади.



НАШР КЎРСАТКИЧИ: 406 123456

Навбатчи муҳаррир: Сардор МУСТАҒОЕВ